

NSUNGI YA DIBUUNDU YA SMYRNE



Tata ya kulutila Nkembo, beto kele na kyese mingi na nkokila yayi na kuzaba ti beto kele na kati ya mioyo ya beto Luzingu yina ke kufwaka ve. Luzingu ya Nzambi ya beto kukabukaka na milaka ya tiya mpe vwandaka na zulu ya mosi na mosi ya bawu, mpe bawu vwandaka bawu nyonso ya kufuluka na Mpeve-Santu mpe bandaka na kuzonza na bandinga yankaka landila mutindu Mpeve vwandaka pesa bawu na kutuba. O Tata, mutindu beto ke tonda Nge ti Nge kabukaka Nge mosi na kati-kati ya Dibuundu. Kukondwa ntembe Mfumu ya beto kutubaka, “Kilumbu yina beno ke zaba ti Mu kele na Tata, mpe Tata na Munu, Munu na beno, mpe beno na Munu.” Mutindu Nzambi ya Mazulu ke zinga na kati-kati ya bantu ya Yandi! “Na mwa ntangu fyoti mpe yinza ke mona dyaka Munu ve, kasi beno ke mona Munu, samu ti Mu ke vwanda na beno, mpe na kati ya beno tii nsuka ya yinza.” Nzila nyonso na nsungi ya dibuundu Nge ke vwanda awa, mutindu mosi mazono, bubu yayi, mpe kukondwa nsuka, mpe beto ke zaba Nge na nzila ya bisalu yina Nge ke sala. “Bidimbu yayi ke landa bawu yina ke kwikila.”

² Mfumu, na kumonaka—na kumonaka dyambu ya zulu ya bansungi nyonso, ntangu ke na kukubamaka na kusuka mpe Seko ke na kubaka kisika. Tata Nzambi, beto kele mingi na nsayi na kuzaba ti beto ke na kuzingaka na yina me bikana bubu yayi; na kotalaka mbote baluzingu ya beto mpe kumona mutindu ya balukanu kele na beto, bamitifi kele na beto, mpe kumona ti Mpeve-Santu kubaka kisika. Nzambi, ti konso muntu na Mvwandulu ya Bunzambi na nkokila yayi kubakula bansungi ya dibuundu yayi yina beto ke na kuzingilaka mpe kukima na nswalu na Mfumu Yesu, samu ti ya kele ya kusonama pwelele, ti, “Nkumbu ya Mfumu kele yinzozo zulu ya ngolo, muntu ya kudedama ke kima na kati ya Yawu mpe ke vwanda na lukengolo.”

³ O Nzambi, kwiza na nkokila yayi mpe pakula moyo ya beto, Mfumu. Nata bantu yina ke yenga-yenga, O Mfumu, bayina kele na kati ya poto-poto; tala na mameme ya mawa, Mfumu, bawu zaba ve yinki ya kukwikila; ya kele na mivungi ke na kubokilaka na bisika nyonso. Beto ke sambila, Tata, ti bawu ke kuwa Mvungi ya nene yango ya mameme, Mfumu Yesu, Mpeve ya Yandi ya nene kuzonza na nkokila, kutuba, “Mwana ya Munu, kwiza na Munu mpe Mu ke pesa nge Saba, Kupema yina ke kanga nge tii kisika ya nge ya nsuka ya Seko.” Ti beto yenga-yenga ve na zulu ya ntoto na yina beto ke mona ntangu kusuka ntangu yayi. Pesa

yawu, Tata. Zonza na nzila ya muntu ke zonza, kuwa na nzila ya makutu ya bayina ke kuwa, samu ti beto nyonso ke na kuwaka. Na Nkumbu ya Yesu beto me sambila. Amen.

⁴ Beno lenda vwanda. Ntangu yayi, na nkokila yayi beto ke longoka nsungi ya dibuundu ya zole. Mu ke mona bantu mingi kubaka banote mpe nyonso, mpe ya kele samu na yina mu zola kumisa yayi mpwelele ntangu nyonso.

⁵ Ntangu yayi, nsungi ya dibuundu ya zole vwandaka ya kubokila nsungi ya dibuundu ya Smyrne. Mpe ya bakaka kisika, Nsungi ya Smyrne, ya bandaka na ntangu mosi Nsungi ya Ephèse kumanisaka. Nsungi ya Ephèse vwandaka kubanda mvula 55 na Manima ya Yesu tii na mvula 170 na Manima ya Yesu. Nsungi ya Smyrne kubandaka na mvula 170 mpe kwendaka tii na mvula 312. Dibundu yayi kele dibuundu yina monaka mpasi; yandi yina lwataka yimpu ya bambangi, ya kele dibuundu ya lukwamusu. Mpe nsilulu ya Nzambi na yawu, na Dibundu ya Kusoola na kati ya yawu, zolaka pesa yawu yimpu ya Luzingu.

⁶ Konso dibuundu vwandaka na *mbwetete* yina vwandaka ya kusimba na diboko ya Nzambi, yina vwandaka monisa “munati-nsangu” ya nsungi ya dibuundu yango. Na mutindu ya mbote yina mu lendaka banza vwandaka munati-nsangu na nsungi ya dibuundu ya Ephèse (samu ti Biblia ke tuba ve nani ba vwandaka) ya vwandaka Paul; samu ti yandi salaka dibuundu ya Ephèse mpe vwandaka mulongi ya nsungi yango ya dibuundu; yina nataka Nsemo na Dibundu, yina Santu Jean bakaka yawu kubanda kuna. Mpe na manima Polycarpe, mpe bayina landaka. . . Polycarpe, na kisika, bayina landaka.

⁷ Ntangu yayi, Nsungi ya Smyrne, mu ke kwikila na nyonso. . . yina mu me lenda na kutala, vwandaka Irénée. Mpe ntangu yayi mu ke zola kutuba na beno samu na yinki ti mu me soola Irénée na kisika ya Polycarpe. Ntangu yayi, pene ya ba-pasteur nyonso ke zolaka kubanza (mpe milongisi ya Biblia) ti wanzio yango vwandaka Polycarpe. Polycarpe vwandaka kilandi ya Santu Jean, ya kele kieleka. Mpe Polycarpe kangaka. . . yandi—yandi vwandaka mbingi, ba kotisaka yandi mbele mbla mosi na ntima mpe kufwaka yandi. Ntangu yayi, kasi yandi vwandaka muntu ya nene, muntu ya buzitu, muntu ya kinzambi, ya mbote. Kukondwa ntembe mosi ya Miklisto ya kulutila nene beto me kuzwaka. Mpe ya vwandaka ve na kima beno zolaka tuba na kutelemina luzingu ya yandi.

⁸ Ya kele samu na yina mu me soola Irénée: samu ti mu ke kwikila ti Irénée vwandaka ya kukangama mingi na Masonuku kulutila vwandaka Polycarpe. Samu ti Polycarpe kupesamaka mingi na dibanza ya Rome na kusalaka organisation. Mpe—mpe Irénée vwandaka kieleka ya kutelemina yawu, kieleka yandi wenzaka yawu. Mpe kuna, mutindu beto nyonso zaba, dyambu ya nene katukaka na Concil ya Nicée; mosi ya mambu ya nene

vwandaka kana ti Nzambi vwandaka *tatu* to Nzambi vwandaka *mosi*. Mpe Irénée bakaka lweka ti Nzambi vwandaka Nzambi, ntangu yayi, kaka Mosi.

⁹ Mu lendaka tanga na *Les Pères Pré-Nicéens*, na buku ya ntete, page 412, kaka masonuku ya fyoti; kana beno zola kusonika yawu, buku ya ntete ya *Les Pères Pré-Nicéens*. Mpe na page kumi na zole, mpe ya kele . . . Kana beno zola buku yango, ya kele nsuka ya kitini ya buku ya tatu. Beno lendaka tanga kima ya muvimba; ya kele na bakapu mingi ya yawu, to bafalaze mingi. Ntangu yayi mu ke banda na kutanga kaka na nsuka—kaka na nsuka ya makumi zole, ya banzila makumi tatu ya yawu. Mu ke tanga yawu nyonso ve, kasi kaka ndambu ya yawu:

“Banzonzolo nyonso yankaka dyaka vwandaka . . . ke basisa kusalu ya mosi mpe ya Moyo mosi;” (Beno me mona, yandi ke na kumekaka na kutuba yina bawu bokilaka Yandi, ‘Tata, Mwana, mpe Mpeve-Santu,’ mpe yandi tubaka, “Ya kele *bisalu*, bankumbu ve, bisalu ya Moyo Mosi.” Ya kele kieleka yina beto ke longaka kaka bubu yayi.) “na, mutindu” (mpe kuna na baparenthèse) “(na Kingelesi), *Mfumu ya Ngolo, Mfumu Tata ya nyonso, Nzambi ya Ngolo nyonso, ya Kulutilla Zulu, Mvangi, Kiyidiki*, mpe nyonso mutindu. Bayayi kele bankumbu ve mpe bisalu ya kulanda ya mioyo yankaka, kasi ya muntu mosi mpe mosi kaka,” (Amen!) “na nzila ya nkumbu ya yina Nzambi mosi, Tata, kele . . . Yandi—Yandi yina bima nyonso yayi . . . kupesaka na nyonso . . . ya luzingu, bweso ya luzingu nyonso.”

¹⁰ Irénée tubaka ti “Bisalu nyonso yayi kele na bunkufi na kati ya Nkumbu mosi, na yisi ya Nzambi mosi, mpe ya kele kaka bisalu ya yina Yandi vwandaka.” Yandi vwandaka Rose ya Saron. Ya kele yina Yandi vwandaka. Ya kele kusalu. Yandi vwandaka Mbwetete ya Suka. Yandi vwandaka Alpha. Yandi vwandaka Omega. Ya kele bisalu ya yina Yandi vwandaka. Yandi vwandaka Tata. Yandi vwandaka Mwana. Yandi vwandaka Mpeve-Santu. Kasi ya kele na Nzambi *mosi*. Nzambi mosi, mpe Nkumbu ya Yandi kele Mosi. Mpe ya kele mosi ya diambu yina mu banzaka ti Irénée vwandaka ya kusungama na kufyongonina ya yandi—ya yandi awa, to ntendu ya Masonuku.

¹¹ Kima yankaka yina mu ke zola kutanga samu na beno, ya kele na kati ya buku: *Wapi Mutindu Yawu Kwisaka?* Mpe yayi kele ya bantu ya masolo. Mpe, *Comment Cela Est-Il Arrivé?* ya R.C. Hazeltine, disolo ya mabuundu ya ntete. Mpe awa na page 180: “Makabu Ya Kimpeve Na Ntangu Ya Irénée, na mvula 177 tii mvula 202 na manima ya Yesu.” Ntangu yayi, raison na yina mu ke na kutangaka yayi, ya ke na kubakama na bande, beno me mona, mpe—mpe ba ke tula yawu na babuku:

“Ya vwandaka na ntangu ya Irénée ti mingi ya mabuundu ya Bantumwa ya France kuzwaka makabu nyonso ya Mpeve-Santu.” Yina katukaka na malongi ya yandi, beno me mona. “Na

Lyon bamambele ya dibuundu ya Irénée,” ya kele na Lyon, na France, “vwanda zonzaka na bandinga. Ya vwandaka ve kima ya nzenza na kumona muntu me kufwa kuvutuka na luzingu. Kubeluka vwandaka—kubeluka vwandaka dyambu ya konso kilumbu na nyonso ya evangéliste. . . na mabuundu ya kupanza nsangu ya mbote bisika nyonso.” Ti Irénée zabaka mutindu ya kulonga! “Bimangu vwandaka ntangu nyonso. Na kieleka, mabuundu yango vwandaka ata mbala mosi ve kukondwa kumonisama ya bimangu ya mvwandulu ya Nzambi to na vision, kusukisa ya bima ya yinza, na bimangu, na kubambusa moyo na Baklisto ya misyoni na kiulumbu yina, ti bawu vwandaka bilandi ya Yandi ya luzolo. Kasi na masolo ya ntama, beto lendaka lokota ve mbala mosi kuvumbuka ya muntu ya kufwa na dibuundu ya ntete ya Rome.”

¹² Ya kele bantu yina ve. . . yina kele na ata lweka ve, bawu ke na kutubaka kaka kieleka. Ya kele bantu ya masolo.

¹³ Ya kele samu na yina mu ke banza na Irénée, samu ti, beno ke mona, yandi vwandaka na mutindu mosi ya lukwikilu yina Paul mpe bilandi samunaka. Ya kele samu na yina mu ke. . . kwikila ti yandi vwandaka wanzio ya dibuundu ya Smyrne, samu ti yandi vwandaka. . . yandi vwandaka na mutindu mosi ya malongi ya Masonuku; mpe malongi mosi ya Masonuku na zulu ya lufulu ya Ndinga ya Nzambi ke basisa kima mutindu mosi ntangu nyonso. Kana beno ke baka kaka na malembe formule ya Nzambi mpe beno baka yawu landila mukanda, ata yina mabuundu ke tubaka, beno landa kaka yawu mutindu yawu ke tuba, yawu ke basisa kima mutindu mosi. Mpe ya kele yina Irénée salaka.

¹⁴ Ntangu yayi, mu banza ti Polycarpe vwandaka muntu ya mbote, beto me bakula; kasi mu me tuba ti yandi pesamaka mingi na kubongisa dibuundu, mpe mutindu vwandaka sala ba-Nicolaïte. Bawu vwandaka bongisa dibuundu, mpe—mpe vwandaka nata kimpangi kintwadi. Yina na kumona na mutindu ya mayela vwandaka mbote mingi, kasi, beno me mona, Mpeve kele mingi na ntwala ya mutindu ya mayela ti. . . beno lenda mpe ve kubanza mbote na—na Mpeve. “Mabanza ya Munu kele mingi zulu na mabanza ya beno,” tubaka Nzambi. “Banzila ya Munu kele zulu mingi na banzila ya beno.” Na yawu ya kele kaka na nzila mosi na kusala yawu; beno landa kaka Yandi landila manaka. Ya kele kieleka.

¹⁵ Ntangu yayi, beto lendaka banza, kana beno vwandaka kwenda awa. . . Kana mu vwandaka kwenda na Chicago na nkokila yayi, mu lendaka basika awa mpe kuzwa samu na munu boussole, mpe kutuba, “Ntangu yayi beto mona, Chicago kele kaka mutindu yayi. Mbote mingi, mu ke kwenda mbala mosi kuna.” Mu ke basika ve na Jeffersonville. Beno me mona? Mu fwana kuzwa samu na munu kalati ya yinza muvimba. Mpe ya kele—ya kele. . . na nzila ya kusonika yina lenda nata munu na Chicago na bangunga sambanu to sambwadi na kutambulaka

na tomabilu, kasi mu lenda zenga kaka nzila nyonso ve. Mpepo lenda zenga kaka ve nzila nyonso; yawu kele na nzila ya mupepe to kiskika ya zulu mingi mpe nyonso ti yawu fwana pepa, na kitezo yina yawu fwana vwanda.

¹⁶ Ya kele na nzila ba salaka, mpe Nzambi kele na nzila. Nzambi kele na nzila samu na Dibuundu ya Yandi, samu na bantu ya Yandi. Mpe Yandi ata mbala mosi ve banzaka ti ba kuyala Yawu na ba-pape, ba-cardinal, ba-archibishop, to mfumu ya ba-surveillant. Mpeve-Santu kele Musansi ya Dibuundu ya Nzambi ya moyo, samu na kusansa Yawu. Mpe busantu nyonso ke kwenda ve na cardinal to na nganga-Nzambi, samu na kusala yandi muntu ya santu na—na dibuundu, to kima mosi. Misambidi kele kaka na muswa mutindu. . . muswa nyonso na Mpeve-Santu mutindu mulongi nyonso, pasteur, diakre, administrateur, nyonso yankaka. Bandimi!

¹⁷ Mpe ya kele samu na yina bawu bokilaka yawu Nicolaïte. . . Mutindu beto talaka mazono na nkokila, ba-Nicolaïte, beto zengaka mpova mpe beto baka yawu na Grec. Mpe N-i-c-k-o, zolaka tubaka. . . *Nicko*, yina zola kutuba “kununga to kubebisa.” Yinki? N-i-c-k-o, Nico-laïte, *misambidi*. “Samu na kununga misambidi,” mpe kubebisa yawu na kupesaka bawu lutumu ya bantu, ba-pasteur yina ke longa bawu mpe ke. . . bawu ke sala nsuka ya bawu mosi kintwadi. Ya kele mutindu Lukutakanu ya Nicée kusimbakaka. Samu mingi kuvukanaka kintwadi mpe yidikaka lutumu na Lukutakanu ya Nicée. Beto ve. . . zola mingi ve kuzonzila na yawu, samu ti ya kele na Kilumbu ya yiya na nkokila, Lukutakanu ya Nicée.

¹⁸ Kasi ya kele kisika Dibuundu ya Katolika ya Rome kubandaka, na nkonga ya bantu yina ndimaka na Santu Paul, mpe Irénée, mpe Santu Martin, mpe nyonso. Bawu kumaka Miklisto na. . . na bumpani na Buklisto, kasi vwandaka zola kuvutula dibuundu na mutindu ya ministele ya Ngwisani ya Ntama, mutindu kuzwa banganga-Nzambi ya ntete, mpe—mpe kulanda ya bantumwa, mutindu pape mosi na pape yankaka, na pape yankaka. Kana beno tala Biblia yayi, beno ke tala ti ya kele kaka kieleka mpe mutindu Nzambi bedisaka kieleka kima yango na mbandukulu. mpe nsungi ya dibuundu ya mazono na nkokila, tubaka, “Mu yina yawu!” mpe mutindu yina salaka Dibuundu.

¹⁹ Nzambi ata mbala mosi ve zolaka ti Dibuundu kuvwanda ya kutwadisa na bantu. Nzambi ke twadisaka Dibuundu ya Yandi, mpe Yandi ke twadisaka yawu na nzila ya makabu ya Kimpeve. Makabu ya Kimpeve kele na kati ya Dibuundu samu na kusungika mpeve. Yandi kele na bisalu ya baministele tanu na kati ya Dibuundu ya Yandi. Ya ntete ya yawu kele bantumwa, to, ba-missionnaire. Missionnaire kele lubokilu ya kulutila nene yina kele, ntumwa. Mpova *missionnaire* zola kutuba “muntu ba me fidisa”; *ntumwa* zola kutuba “muntu ba me fidisa.” Samu na yinki ba soolaka na kuvwanda ya kubokila ba-missionnaire,

mu zaba ve. Kasi ba kele bantumwa. Mbote mingi. Bantumwa, baprofete, milongisi, ba-évangéliste, ba-pasteur. Ntangu yayi, yina kele bisalu yina Nzambi soolaka samu na Dibuundu ya Yandi.

²⁰ Na yina na konso dibuundu ya kele na makabu yivwa ya kimpeve yina ke salaka na kati ya bantu, ya kele luzabu, ndwenga, makabu ya kubeluka, kusala bimangu, kuzonza na bandinga, kutendula bandinga. Mpe bima nyonso yayi kele na kati ya nzutu ya konso dibuundu. Mpe muntu nyonso na dibuundu kele na ministere ya yandi mosi, mpe ministere yango ya yandi mosi ke tambula kintwadi na ministere ya bayankaka, samu na kutwadisa Nzutu ya Yesu Klisto. Mpe ata fioti ve . . .

²¹ Ntangu yayi, beno bambuka moyo na yayi, ti awa kele . . . Mu ke fikula banzila yayi na nkokila yayi. Dibuundu ya ntete, Ephèse; Smyrne, Pergame, Thyatire, Sardes, Philadelphie, Laodicée. Ntangu yayi, beno bambuka moyo na yina yayi ke landila, dibuundu *yayi* kuzwaka kufuluka ya Mpeve, kasi na nsuka ya nsungi ya dibuundu beto ke tala ti ba zengaka Yawu. Nsungi ya dibuundu yina landaka zengaka fyoti mingi; fyoti mingi; tii mosi *yayi*, ya vwandaka kaka kima ya fyoti mingi. “Nge ke na bima fyoti,” Yandi tubaka. Oh, ntangu beto ke kuma na Nsungi yango ya Dibuundu ya Thyatire!

²² Ntangu yayi, na manima yina me kwiza, Nzambi telemisaka Allemand mosi na nkumbu Martin Luther yina vutulaka dyaka Dibuundu. Yawu kutalanaka fyoti mingi, yandi vwandaka longa Kunungisama; kuna kwizaka Martin Luther, vwandaka longa Kunungisama. Kuna me kwiza John Wesley mpe vwandaka longa Kusantisama. Na yina na nsungi ya dibuundu *yayi* awa, ba vutukaka dyaka mbala mosi kaka na Mbotika ya Mpeve-Santu, na bidimbu mpe mambu mosi ya ngitukulu, ke kukulumuka kaka. *Awa* kele kisika yawu lutilaka bamvula funda na bankama tanu ya Banssungi ya Mudidi. Mpe ya kele kisika mudidi . . . to ntangu ya kulutula yinda ya dibuundu yina beto kuzwaka na bansungi ya dibuundu. Na yina *awa kele* kisika ya bandaka na kubasika, Kunungisama, Kusantisama, Mbotika ya Mpeve-Santu. Mpe Biblia ke tuba ti, “Na nsuka ya nsungi *yayi*, ti mwa ndambu ya bantu yayi awa ke dyatama samu ti dibuundu mosi yango ya Pantekote ke banda na kusala kima mosi bawu bandaka ntama *awa*, ba-Nicolaïte.” (O Nzambi, ti mu kanga yinwa ya munu tii mu ke kuma na yawu.) Beno me mona? Yina mu lenda mona kuna. Beno me mona, tii ntangu beno lenda mona awa. Mpe mu ke talisa beno ti munati-nsangu ya nsungi ya dibuundu yayi ke yina ba-dénomination. Mpeve ke vumbuka na bana. Ya ke vwandaka ntangu nyonso. Mpe ntangu yayi beto kele . . .

²³ Ntangu yayi, kana beno ke tala yayi, mutindu Yawu vwandaka nene awa, basikaka, mpe na nsuka Yawu vwandaka ya kukangisa nzila nyonso. Na manima Yawu bandaka dyaka.

Luther vutulaka Yawu, Kunungisama; Kusantisama; Mbotika ya Mpeve-Santu; mpe kaka kuna na nsuka, yandi kangisaka kaka Yawu, tii Yayi pene ya nyonso me kufwa, ya kele kaka na kitini ya fyoti kuna, mpe ya kele na yina yandi bokaka ti “Kana Yandi kumisa kisalu nkufi ve samu na mbote ya Misolami, ata nsuni ve ke kuzwa mpulusu.” Beno me mona? Beno bawu yayi, kaka na ntangu ya nsuka. Ntangu yayi beno kanga yawu na dibanza.

²⁴ Ntangu yayi beto ke banda Nsungi yayi ya Dibuundu ya Smyrne. Na ntete mu zola kufyongonina yawu awa landila mwa mukanda yina munu—yina kele na munu. Ntangu yayi, nsungi ya dibuundu ya zole na kuvwandaka Smyrne, mpe mu ke kwikila ti beno nyonso ke wisana na munu (to mu banza, to ndambu, na mutindu mosi) ti Irénée vwandaka mbwetete ya nsungi ya dibuundu yango. Yandi vwandaka munati-nsangu ya Nzambi samu ti yandi sabukaka yinsi, ya France (Gaule), na kati kuna, mpe yandi salaka mabuundu, mpe mosi na mosi ya bawu vwandaka ya kusala na zulu ya mbotika ya Mpeve-Santu, kuzonga na bandinga, kuvumbula mafwa, kubelusa bambevo, kukanga bamvula, mpe kusala ya bimangu konso kilumbu. Bawu zabaka ti Nzambi ya moyo vwandaka zinga na kati ya bantu. Ya vwandaka muntu ya Nzambi, samu ti Yesu tubaka, “Muntu ve lenda sala . . .” To, bantu tubaka, “Muntu ve lenda sala bisalu yayi kana ti Nzambi kuvwanda na yandi.” Ya vwandaka Nicodème yina tubaka yawu na Yesu.

²⁵ Ntangu yayi, mbanza ya mumbungu; nzadu ya mumbungu na Lydie mpe na wesete. Mbanza ya tatu na Asie, mbanza ya nene ya dibungu. Zabakanaka na bimvwama, batempelo, na bivinga ya nene, balukolo, kimunganga mpe science. Ba-Juif vwandaka zinga na—na Smyrne, mpe bawu mwangisaka nsangu na bantu ya Smyrne. Polycarpe vwandaka bishop ya ntete ya Smyrne. Polycarpe mpe bisadi yankaka ya kukwikama salaka lukwikilu ya Nzambi ya kati na bantu ya lukwikilu ya Smyrne. Batata ya dibuundu ya ntete pesaka malongi ya Kieleka na Smyrne.

²⁶ Nsungi ya dibuundu ya Smyrne, nkumbu ya dibuundu vwandaka Smyrne, *Smyrne*, na kisika, ya zola kutuba “ndudi,” mile. Ya kele ya kuvukana na lufwa, samu ti ba vwanda kufwa.

²⁷ Ba monisaka dibuundu yina mpasi, Nzambi ke bokila bawu “bayina ba monisaka mpasi.” Nzambi talaka na bampasi ya bawu, mpe pesaka lemvo samu na kunata yawu. Yandi talaka na balukwamusu ya yandi, mpe pesaka bawu kununga na zulu ya lufwa. Yandi talaka na bumputu ya bawu, mpe pesaka bawu bimvwama na kati ya Yandi. Dibuundu ya Smyrne lutaka na dibulu ya tiya ya balukwamusu, kasi, vwandaka mananasi ya nsunga ya mbote samu na Yandi. Ya kele Yina bikanaka ntangu yayi, ve dibuundu nyonso ya Smyrne; mu ke na kuzonzila kaka na Yina bikanaka. *Bilumbu kumi ya lukwamusu* ya nene zola kutuba “bamvula kumi ya mpasi ya kulutula ya kubasisa menga.”

²⁸ Mu zaba ve kana mu ke lenda kutanguna nkumbu yayi, to kutanga yawu, to ve. Yayi vwandaka mfumu na ntangu yina, mu banza vwandaka muntu lutilaka kubasisa menga na bawu nyonso tuka Néron na mvula 67, D-i-o-c-l-é-t-i-e-n. Na kati ya bamvula 303 tii 312 na manima ya Yesu.

²⁹ Nzambi pesaka malongi na Smyrne na kuvwanda ya kukwikama tii lufwa, mutindu Yandi vwandaka, “Mpe Mu ke pesa nge yimpu ya Luzingu, mutindu Tata pesaka Munu.” Nzambi silaka kinungi (na balukwamusu) kununga na zulu ya lufwa ya zole, “Beno kima bawu ve yina lenda kufwa nzutu, kasi Yandi yina lenda bebisa moyo, to, kufwa moyo.” Yawu . . . Bantu ya Smyrne zolaka kanga ntima tii nsuka, “Beno kima bantu ve, mpe yimpu ya Luzingu ke pesama na beno.” Mpasi ya Buklisto na bansungi kele kifwanukusu ya bansungi ya dibuundu, ya Smyrne, kele mfunu mingi. Beto ke zola kaka kukuma na yawu na mwa ntangu fyoti, kana Mfumu zola.

³⁰ Ntangu yayi, kana mosi ya beno kondwa mosi ya bayayi na yina . . . kana mu ke sonika yawu na mbangu mingi samu na bantu yankaka ya kalasi, na yina beto ke . . . beto kele . . . kieleka beno lenda kuzwa yawu na beto ntangu nyonso yina beno zola, beto ke vwanda na kyese na—na kupesa yawu na beno. (Beno lemvokila munu.)

³¹ Ntangu yayi na kapu ya 2 mpe nzila ya 8, beto ke banda na nkokila yayi. Ntangu yayi, na zulu ya yinki beto bika Yandi mazono na nkokila? Yandi vwandaka kieleka . . . yinaka ba-Nicolaïte yango. Ya kele kieleka? Ntangu yayi yinki Nzambi ke sala? Yinki beto fwana mona kuna na ntete? Luzayikisu ya Yesu Klisto, Nani Yandi kele mpe yina Yandi kele. Ntangu yayi kima ya nene ke landa, beto talaka ti Yandi ke yinaka nyonso yina ke tula kima na kutwadisa Dibundu ya Yandi na lweka yankaka ya Yandi mosi. Yandi kele Nzambi ya kimpala.

³² Mutindu mu ke zola kutelama, samu ti beto kele kaka na banzila yiya awa, kaka samu na kutuba mwa kima mosi. Bantu yikwa lenda bambuka moyo ntangu profete ya mbote, Samuel, ntangu Israël nyonso zolaka kusala mutindu bayankaka ya yinza? Beno ke bambuka moyo na yawu? Mpe profete tubaka na bawu, na kutubaka, “Beno kele na foti!” Kasi bawu zolaka kusala mutindu ba-Philistin, mpe mutindu bayankaka ya bawu. Mbote, ya kele kieleka yina salamaka na nsungi kaka ya dibuundu ya ntete. Ya kele ngitukulu ti bantu zola ve ti Nzambi kutwadisa bawu. Bawu zola kulanda . . . bawu zola muntu mosi. Israël, salaka foti ya kulutila nene yina bawu salaka ntete ve, ntangu . . . Lemvo kubikaka yimeni samu na bawu profete, ntwadisi, kubikaka samu na bawu mwana-dimeme mutindu kukatula-masumu, mpe kubikaka samu na bawu madya ya mazulu, mpe bima nyonso ya mbote yina lemvo zolaka kubikaka samu na bawu, mpe dyaka, na Exode 19, bawu zolaka musiku.

Bawu zola kusala badokotolo ya bunzambi, mpe kuzwa mwa bantu, ba zolaka kuzwa kima ya kusala na Yawu, mpe.

³³ Muntu ntangu nyonso ke mekaka na kulutila mayela na Kiyidiki ya kieleka yina salaka yandi, mpe yandi ke salaka kima mosi ve kasi kufwa yandi mosi. Mutindu mwa Balumingu me luta mu longaka na *Nsambulu Yina Ba Me Vukisa*. Mpe ya kele kieleka. Ntangu beno ke vukisa kima, ya lenda ata mbala mosi ve. . . ya me kufwa! Ya me suka, ya lenda vutuka dyaka ve. Mulet lenda buta dyaka ve mpe kuzwa mulet yankaka, samu ti yandi—yandi kele mulet, yandi kele yina ba me vukisa. Disangu ya mbote, beno lenda ve kuzwa disangu ya mbote na disangu ya mbote yina ba me vukisa. Ya ke mpe ve. . . Ya lendaka mena, kasi ya kele—ya kele, oh, ya kele ata mbote fyoti ve. Beno lenda sala yawu ve. Nyonso yina kele yina ba me vukisa kele mbote ve.

³⁴ Mpe nsambulu yina ba me vukisa kele ata mbote ve! Ntangu nyonso yina beno ke meka na kubwela kima na yina Nzambi tubaka, to kusala kima yina Nzambi ke zola ve ti beno kusala, ya kele nsambulu ba me vukisa. Ya lendaka talana kitoko. Oh, disangu ba me vukisa ke lezima kulutila na disangu ya yinza. Mulet ya kiboba ke sala kulutila bampunda zole. Mbote, ya kele. . . Ya ke simba ve, mpangi, ya kele na lemvo ti beto kele ya kuvuuka. “Ve na bisalu beto kele ya kuvuuka, kasi na lemvo.” Na yawu ya lendaka. . . Mu banza ti beno ke banza ve ti mabanza yayi. . . Beno kele—beno kele na kati ya kudasuka, mpe mu—mu ke kuwa yawu na zulu awa. Beno me mona? Samu ti ya kele na ba-Presbytérien, ba-Méthodiste, mpe mitindu nyonso na kati awa. Beto zaba yawu. Mpe na yawu mu—mu ke kuwa yawu. Mpe beno fwana kubika yawu fyoti mwa ntangu yankaka, mutindu, kukatukila yawu.

³⁵ Ntangu yayi, beno kuwa. Kima nyonso ba me vukisa kele mbote ve. Beno fwana baka ya ntete, mutindu Nzambi salaka yawu, kuna beno ke kuzwa kima yina kele kieleka.

³⁶ Ntangu yayi, beto me tala kuna ti dibuundu yayi ya Israël, na yina bawu vwandaka landila nzila, Nzambi dikisaka bawu, mpe kebaka bawu, mpe salaka nyonso samu na bawu. Mpe na nsuka bawu talaka na ba-Philistin, mpe na ba-Amoréen, mpe. . . mpe bantu yankaka, mpe tubaka, “Beto zola ntinu! Bawu kele na kima yina kele ve na beto.”

³⁷ Ya kele kima mosi yina bantu ke salaka bubu yayi. Mosi ya bayayi, bampangi ya beto ya bakento, ke tala na televizyo mpe ke mona Gloria Swanson, to muntu nyonso bawu. . . bayankaka ya bawu bakento na mutindu mosi ya robe ya kulwata, mpe bawu ke lenda kaka ve kubika yawu tii ntangu bawu ke kuzwa mosi. Beno me mona? Beno ke mona kento mosi na ville, “Oh, ya kele ve kitoko?” Yinki beno ke kipe yina yandi me lwata? Bantu, bawu kele kaka mutindu yina, mu tubaka ya kele kilumbu ya—ya kumekula, muntu mosi ke zola kumekula muntu yankaka. Beno

baka . . . Ya kele na ba-Elvis Presley mingi bubu yayi, mu—mu ke tuba na beno, beno lenda fulusa bawu ve na ba-wagon, samu ti yandi me kuma ya kuzabana na comp- . . . bakumekula ya nsuni!

³⁸ Beto kele na kima mosi na nsambulu. . . . Mu vwandaka tanga disolo ya Martin Luther, mpe muntu nyonso ya beno bantu ya masolo zaba. Ba tubaka ya vwandaka ve kima ya ngitukulu ti Luther zolaka telemina dibuundu ya Katolika mpe kukwenda, kasi dinsweki ya kulutula nene, ti yandi lendaka kukanga yintu ya yandi na zulu na bufanatiki nyonso yina landaka réveil ya yandi mpe vwandaka dyaka na Ndinga. Beno tala kimangu, mutindu Nzambi bumbaka yandi kuvedila mpe ya kusungama.

³⁹ Ntangu yayi, na yawu bawu kwizaka na Samuel yayi. Bawu tubaka, “Sala na zulu ya beto pro- . . . to sala na zulu ya beto ntinu.” Mpe Mfumu tubaka na yandi ti Yandi mangaka dibanza yina, kaka kieleka yina Yandi mangaka awa na organisation.

⁴⁰ Kaka mutindu Yandi mangaka yawu, Yandi mangaka ba-organisation. Yandi ke manga ve organisme, kasi organisation. Organisme, beto fwana kuzwa yawu. Kasi organisation beto fwana kuzwa ve, samu ti yawu ke salaka bandilu: “Beto kele *Yayi-mpe-yayi*.” Nge kele Muklisto? “Mu kele Méthodiste.” Nge kele Muklisto? “Mu kele Baptiste.” Yina ke zola kutuba mingi ve kulutula na ngulu na kati ya yinzo ya bangulu. Ya kele na kima mosi ve ya kusala na Yawu, ata fyoti ve. Muklisto!

⁴¹ Mu yufulaka mwana mosi ya kento nkokila mosi, na estrade, “Nge kele Muklisto?”

Yandi tubaka, “Mbote, mu ke pesa nge nsangu, mu ke nyengisaka buzi konso mpimpa.” Mutindu ti ya vwandaka na kima ya kusala na Buklisto!

⁴² Muntu yankaka tubaka, “Mbote, mu kele muntu ya Amerika. Kieleka!” Mbote, yina kele na kima ve ya kusala na Yawu, kima mosi ve. Beno kele Muklisto samu ti beno kele ya Kimfumu yankaka. Ya kele kieleka. Mpe beno kele—beno kele na Kimfumu yankaka, na zulu.

⁴³ Ntangu yayi, yinki Samuel salaka? Kaka kima mosi yina Nzambi salaka awa. Samuel bokilaka Israël, yandi tubaka, “Ntangu yayi, beno kuwa munu. Mu zola kuyufula beno kima mosi. Ya kele na kilumbu mosi mu tubaka na beno kima mosi yina vwandaka ve kieleka?” Yandi tubaka, “Mu—mu kele profete ya Nzambi na kati ya beno. Beno tuba na munu kilumbu mosi mu tubaka kima mosi na beno na Nkumbu ya Mfumu yina salamaka ve.” Ya kele yina Samuel tubaka na bawu. Yandi tubaka, “Mpe Nzambi dikisaka beno ve mpe kebaka beno ve mpe salaka bima nyonso yayi?” Yandi tubaka, “Beno ke na kusalaka disumu na kumekaka na kusala mutindu bayinsi yankaka.”

“Oh . . .” bawu tubaka.

44 Yandi tubaka, “Mu zola kuyufula beno kima yankaka. Mu me bakaka ntete mbongo na beno? Mu me lombaka beno ntete munkayulu? To mu me tubaka ntete kima na Nkumbu ya Mfumu yina salamaka ve?”

Bawu tubaka, “Ve. Ata mbala mosi ve nge me bakaka mbongo ya beto, ya kele kieleka. Mpe nge me tubaka ntete ve kima na Nkumbu ya Mfumu yina me salamaka ve.”

Yandi tubaka, “Na yina beno kuwa munu! Beno ke sala disumu na kumekaka na kusala mutindu bayankaka ya bawu.” Kasi bawu zolaka kaka ntinu! Ata ti ya vwandaka mbote to ve, bawu—bawu zola kusala dibanza ya bawu.

45 Ya kele kima mosi dibuundu salaka kaka awa na Ephèse, ba bakaka malongi ya ba-Nicolaïte. Mpe na yina bawu salaka, ya nataka kaka bawu na kundima bumpani mpe Buklisto kintwadi mpe nataka funda na bankama tanu ya bamvula ya Bansungi ya Mudidi. Mpe ntangu Luther basisaka bawu, kana (na ntangu ya zole) ba-Lutherien salaka ve kima mosi bawu salaka kuna na Ephèse! Kieleka.

46 Ntangu yayi, kana beno ke tala, minda vwandaka ve ya kusala mutindu *yina*. Ya bandaka na yisi na mutindu yayi mpe mataka. Mbote, yina vwandaka zulu mingi ntama na kisika Yandi vwandaka ya kutelama vwandaka yandi yayi na zulu *awa*. Mpe Buklisto na kulandilaka bitezo vwandaka ya kukangisa na yina yawu vwandaka kwenda kisika Yandi vwandaka ya kutelama na mutindu kulunsi, mutindu beto monaka Yandi na kapu ya 4; na mutindu kulunsi mutindu *yayi*. Mpe *yayi* kele diboko ya Yandi ya bakala, *yina* vwandaka diboko ya Yandi ya kento. Ntangu yayi, kaka *awa*, Yandi vwandaka na diboko ya Yandi na dibuundu *yayi* mpe na dibuuundu *yina*. Yandi vwandaka Alpha mpe Omega mpe, kieleka, nyonso vwandaka na kati-kati ya nyonso zole, bisono yankaka nyonso. Kasi Yandi tubaka kieleka, “Alpha mpe Omega.” Yandi vwandaka na mukyama na zulu ya yintu ya Yandi, yina vwandaka ngwisani ya Yandi.

47 Ntangu yayi, kana beno tala, nsemo ya Pantekote, kisika ya bandaka, na mutindu ya kitezo vwandaka ya kukangisa. Bantu yayi, Irénée, Polycarpe, nyonso ya bayankaka ya bawu kangaka kimbangi ya bawu na menga ya bawu, tii yawu na nsuka kangisaka Buklisto na bilumbu ya mudidi.

48 Ntangu yayi beno tala, nsungi ya ntete na lweka yankaka ya hameau ya nene yina, vwandaka kwiza mwa Nsemo ya fyoti, Nsemo mingi, mpe Nsemo mingi. Beno mona mutindu Yawu bandaka na kulezima dyaka, na kubasikaka kilumbu yina. Mpe ntangu yayi na nsuka ya nsungi *yayi*, ya kele ya kusamuna awa ti ya ke kwiza na *Laodicée*, “ya madidi ve tiya ve.” Ntangu yayi, awa ya kele. Samu na yinki, kana kima *yayi* awa nataka bawu na *yayi*, samu na yinki beto ke zola yawu awa na yisi na Pantekote?

49 Mpe beno zaba Biblia ke tuba, “Ya ke vwanda na kibulu.” Mpe beto zaba ti ya kele bu-pape ya Rome. Ya kele kaka kieleka. Mpe na manima bawu ke sala kizizi na kibulu yango. Yinki kele kizizi? Kima ba me sala mutindu yawu. Mpe yina kele kimvuka ya mabuundu, mpe Pantekote kele na kati ya yawu. Ya ke kwiza ntangu kisika beno ke vwanda to ya organisation to beno lenda fungula ve mwelo ya beno. Ntangu yayi beno mona kana ya kele kieleka ve! Ya kele samu na yina beto ke bula yawu tii na lufwa. Yinga, tata. Beno ke lenda ve. . . Ke kwenda ntama kulutila yina, bawu ke meka na kubyeta beno yimbi mingi, tii bawu ke meka na. . . ke bika beno ve kusumba to kutekisa kana ti beno kuzwa kidimbu ya organisation yango na beno. Ya ke na kukotisaka kaka yawu.

50 Kieleka kaka mutindu kilumbu yina, ba nyengisaka bawu, bawu. . . Mu telamaka kuna na arène yina; mu dilaka mutindu bébé ntangu mu nangulaka meso na kutala kuna kisika ba-gladiateur zolaka vwanda na arène yango ya ntama kuna. Mpe—mpe na kumona bima yango, mpe kuzaba ti mingi ya bankundi ya munu Miklisto ba kudyaka bawu na bankosi mpe—mpe ba pasulaka bawu na bitini-bitini na ntoto yango kuna, mpe bakento mpe bana ya fyoti mpe nyonso. Mpe mu ke banza, kana bawu nyonso kulumukaka na lukwikilu, mu ke bika bawu na yisi ntangu yayi? Ve, tata, mpangi! Nzambi, ti mu telama samu na Lukwikilu yina vwandaka mbala mosi ya kupesa na basantu! Kima mosi yina, ata mutindu kuzabana ve. . .

51 Muntu mosi ke zolaka kutuba ntangu nyonso, “Mbote, . . .” Ntama mingi ve mu tubaka. . . Oh! Milongi ya nene yikwa na bilanga ya kumwangisa nsangu bokilaka munu mpe tubaka, “Mpangi Branham, kana nge telemisa yawu ve, organisation nyonso ke telemina nge.”

52 “Mbote,” mu tubaka, “ya kele na Mosi yina ke vwanda ve, ya kele Yina kele na Mazulu. Ya kele na Yandi mu ke na kutalaka.” Beno me mona? Ntangu yayi, mu zola bantu ya konso organisation. Kieleka. Kasi mu me tubaka ntete na beno kima yina Mfumu. . . na Nkumbu ya Mfumu, yina salamaka ve? Beno me mona? Nyonso yina tubamaka mpe ya salamaka ya kieleka? Mu me lombaka beno ntete mbongo? Na yina beno basisa na ba-organisation! Beno vwanda na kimpwanza na kati ya Klisto, ti Mpeve-Santu ntangu nyonso kusala na kimpwanza na dibuundu.

53 Kima yina kele kaka dyambu, beno nata ntama na beno mwa baluswaswana nyonso yayi. Mwa ba-isme, mpe mwa bakuwa ya yimbi yina kele na beno na bankundi, mpe bima mutindu yina, beno katukila yawu! Beno bika ata musisa ya ndudi kukota na moyo ya beno. Kana beno sala yawu, ya ke bolisa beno. Kieleka. Beno vwanda na luzolo! Mu ke kipe ve lutangu ya bantu ke yina beno, beno zola bawu na mutindu nyonso. Kana beno lenda sala yawu ve, beno kele na nsatu. . . na. . . beno ve. . . beno

kele ve ya kukangama, beno kele dyaka na kisika yina kele ya kukanga mbote ve. Na yawu beno kwiza, beno vutuka, mpe ti beno vwanda ya kukangama kieleka mbote na Menga ya Klisto. Ya ke vedisa beno na misisa nyonso ya ndudi. Yinga.

⁵⁴ Ntangu yayi, beno me mona, kasi beto ke na kumekaka dyaka. Lusakumunu ya Pantekote kubwaka pene ya mvula 1906, kisika mosi na kati kuna. Ya kele na mulongi ya kuvwanda na beto na nkokila yayi, missionnaire ya Tibet, mosi ya . . . mu ke tuba ve yawu samu ti yandi kele awa; mu banza ti yandi kwendaka ve na yinzo. Mu banza ti yandi kele dyaka awa, yandi zolaka zona samu na beto fyoti ntete mu kwiza. Mpe muntu yina ke bambuka moyo na ntonono ya Pantekote. Ya vwandaka ve na ata organisation, bantu nyonso vwandaka na nyonso kintwadi. Oh, wapi mutindu pete-pete ya kele na kubaka nzila ya yimbi kaka kuna, mpe wapi mutindu mbote ya ke talana na muntu ya mayela.

⁵⁵ Beno tala, Israël zabaka fyoti ntangu bawu vwandaka ya kutelama kuna na simu, na kubokaka . . . Ntangu yayi, beno ke tuba, “Mutindu ya nsambulu yayi kele kima ya malu-malu.” Oh, ya kele ya kulutila ntama na yina kele. Kieleka. Mpe ntete yinza kusalama, bawu vwanda bokaka mpe kukembilaka Nzambi. Nzambi tubaka yawu, yufulaka Job, “Wapi kisika yandi vwandaka ntangu—ntangu bambwetete ya suka vwandaka yimba kintwadi, mpe bana ya Nzambi vwandaka boka na kyese.” Ya kele ntete yinza kuvangama.

⁵⁶ Kasi ntangu yayi beno tala Israël, bawu me mona bimangu. Ya kele Pantekote ya ntete; Israël, Pantekote ya kilumbu yina. Ntangu yayi ba me basisa bawu na Egypte, Nzambi me sakumuna bawu, me pesa bawu mitindu nyonso ya bidimbu mpe mambu ya ngitukulu ya nene, mpe me vulusa bawu. Mpe ntangu bawu telamaka na simu yina mpe me kuzwa lukutakanu ya Pantekote. . . Bawu kuzwaka! Ntangu yayi beno kuwa. Moise yimbaka na Kimpeve, mpe Marie bakaka tambourin mpe kimaka na yisi ya simu, na kubulaka tambourin yayi, na kubinaka na Kimpeve; mpe bana ya bakento ya Israël kulandaka yandi, na kubinaka na Kimpeve. Kana ya kele ve lukutakanu ya Pantekote, mu me monaka ntete mosi ve. Bawu kwikilaka fyoti ti yinsi ya nsilulu yango vwandaka makumi yiya ya bamvula na ntwala ya bawu. Ya vwandaka kaka pene ya bakilometele makumi sambanu na yiya. Kasi ya bakaka bawu makumi yiya ya bamvula na kuzwa bakilometele makumi sambanu ya kele samu bawu soolaka kima ya yimbi. Bawu soolaka na kuzwa musiku na kisika ya kubika Mpeve-Santu kutwadisa bawu, Dikunzi ya Tiya kubaka bawu mpe kutwadisa bawu. Bawu zolaka kuzwa kima ya kusala bawu mosi; bawu zolaka na kuzwa mwa banganga-Nzambi, mpe mwa bantu ya buzitu, mpe mwa théologie samu bawu sala mwa mambu, na kisika ya kulandilaka kaka mpe kubika Mpeve-Santu kutwadisa bawu. Ba vwandaka

na Kimpeve; Nzambi kubikaka nyonso, kasi bawu zolaka kuzwa kima ya kusala na kati ya Yawu.

⁵⁷ Kaka mutindu kuvukisa dyaka. Beno bika ngombe ya kento swi. Beno bika mpunda swi. Beno bika madya swi. Bawu... Science tubaka, na *Reader's Digest*, na mukanda ya yawu, kana bawu landila na kuvukisa madya, mpe bantu kudya yawu... Mutindu bansusu, bawu ke kuzwa nsusu yina ya mawa tii ya ke vwanda na ata mapapu to makulu. Mpe kana ya buta, ya ke buta yawu mosi ke kufwa, ba lenda zinga kaka mvula mosi. Mpe nsuni kele pete-pete mingi na mpasi ti beno lendaka ve kudya yawu. Mpe bantu ke na kudya yawu, ya ke na kubebisaka bantu. Ya kele kieleka.

⁵⁸ Beno zaba, ba-homosexuel ke na kufulukaka pene ya makumi yiya na zulu ya nkama na États-Unis, na mvula me luta. Mpe beno zaba ti science samunaka ti bakento ke na kukumaka nene mingi na mapeka ya bawu mpe fyoti na luketo, mpe babakala ke na kukumaka fyoti na mapeka ya bawu mpe nene mingi na luketo? Beno ke na kudya nkuna ya kubeba, beno ke na kudya kima ya kubeba. Nzutu ya beno kusalamaka na kukula na bima ya yinza. Mpe yinki ya ke na kusalaka? Ya ke na kusobisaka mpe nzila ya yinza ya babakala mpe bakento, tii Hollywood, mpe luyalu ya beto, mpe nyonso kele ya kufuluka na kubeba. Yinki yandi ke na kusalaka? Bawu ke na kunataka yawu bawu mosi na nzila ya yinti ya bawu ya luzabu, na kufwaka bawu mosi.

⁵⁹ Beno vutuka na mbandukulu! Beno bika yinza swi. Beno bika Nzambi swi. Beno bika Dibuundu na kati ya Mpeve-Santu; mpe beno kwenda ntama ya ba-évêque mpe ba-pape nyonso yayi na mitindu nyonso ya malongi. Beno vutuka na kisika beto bandaka. Beno vutuka. Yesu lendaka kwiza na nkokila yayi, beno ke tuba, “Mu kele Méthodiste.”

Yandi ke tuba, “Ya vwandaka ve mutindu yina na mbandukulu!”

“Mu kele Presbyterien.”

“Ya vwandaka ve mutindu yina na mbandukulu!” Yinki vwandaka na mbandukulu? Nzingulu ya Pantekote ya mbotika ya Mpeve-Santu. Ya kele mutindu Yawu bandaka.

⁶⁰ Kasi, beno mona, ya lungaka ti beto bebisa yawu. Oh, ya ke sala ya kulutila kitoko. Kieleka. Dibuundu yango ya fyoti ya kutelama kuna ke na kubinaka, mpe ke na kubokaka; mpe kuna na bala-bala, mpe bantu ke losa bawu matadi, ke seka bawu, mpe nyonso mutindu yina. Yina kele kitoko mingi ve. “Kasi ntangu yayi beto kele na Doxologie ya nene, mpe Credo ya Bantumwa, mpe, oh, Mulongisi na Doctorat ya Philosophie, na Doctorat ya Droit ya mbala zole na Doctorat ya Droit, *yayi-mpe-yayi* samu na pasteur ya beto.” Mpe kubasika mpe kutuba, “Ah-

bakala,” mutindu mwana ya ngombe yina kele na ba-crampe, mpe ke landila mutindu yina, na mutindu nyonso yina ya bima.

⁶¹ Beno lemvokila munu, mu—mu zolaka ve kutuba yina. Beno lemvokila munu, mu zolaka ve kutuba yawu mutindu yina. Beno me mona? Mu zolaka ve kutuba yawu. Ya kele ve ya kulunga na kisadi ya Nzambi.

⁶² Kasi, beno tala, nyonso yayi, mu . . . ya me kwiza kaka na zulu ya dibanza ya munu, beno me mona. Kasi kutelama mpe kutuba bima nyonso yayi ya kuswaswana mutindu yina, kusala ntete . . . beno zaba, na kutubaka, “Ntangu yayi, ve, beno ke tuba yawu ve mbote. ‘Ah-bakala.’” Mu ke zolaka, lukutakanu ya ntama ya Pantekote kisika ngolo ya Nzambi ke kubwaka, mpe beno ke dila kaka mpe ke boka mpe ke kembila Nzambi, kuzwa ntangu mosi ya nene. Ya kele mutindu; Mpeve fwana kusimba bantu. Kasi beto . . . Beno lenda ve kuwa “Amen!” na mpasi dyaka, ya kele “Ah-bakala.” Na mutindu nyonso, ya kele kisika beto me kuma. Ba-organisation ya madidi, ya lunangu yayi . . .

⁶³ Ntangu yayi ntu- . . . Ya vwandaka na profesu yina ke tala yawu? Beno ke bambuka moyo na profesu ya Paul mazono na nkokila? “Mu zaba ti na manima ya kukwenda ya munu, bayingo ya yimbi ke kota na kati-kati ya beno, mpe bantu ya kalasi ya beno mosi, ya beno . . . kaka na dibuundu ya beno mosi (Dibuundu yango ya Katolika ya Rome, ke telama) ke telama na kati-kati ya beno mpe ke benda bilandi na manima ya bawu.” Mpe bayingo ya Paul, beto talaka, kumuka ba-Nicolaïte.

⁶⁴ Beno kuwa Mpeve kuzonza dyaka na nzila ya profete, “Na bilumbu ya nsuka bantangu ya mpasi ke kwiza, samu ti bantu ke vwanda bantu ya luzolo ya bawu mosi, (‘Mu kele Mulongisi *Kingandi*, beno tuba ve na munu yina me tala Yawu, ntangu yayi. Mu ke sala beno kuzaba ti mu kele Presbytérien. Aleluya!’ To, ‘Mu kele Pentecotiste.’)” Wapi luswaswanu ya ke sala, kana beno kele ve Pentecotiste ya kubutuka? Nzingulu ya yawu, beno me mona. Inga, tata. “Mu kele ya ba-Assemblée.” “Mu kele ya Eglise de Dieu.” Mbote yina . . . wapi luswaswanu ya ke sala na Nzambi? Beno fwana vwanda ya Kimfumu ya zulu kuna, beno me mona. Ya kele kieleka.

⁶⁵ Ntangu yayi, kana—kana beno mona, . . . bima nyonso yayi kele kaka kuvukana ya—ya kilengi. Ntangu yayi, Yawu ke tuba, “Bawu ke vwanda bantu ke dasuka na mbangu, bantu ya kuzola kyese kulutila na luzolo ya Nzambi.” Oh, bawu lenda ve kukwenda na dibuundu na Lumingu na nkokila ntangu nyonso yina ya kele na manaka mosi ya mbote na televizyo. Oh, la la! Ntangu nyonso bawu . . . Mpe mabuundu kele na bakipi ya football, mpe basupu ya nkokila, mpe bantangu ya bansaka ya cricket, mpe, “bantu ya kuzola kyese kulutila na luzolo ya Nzambi, bantu ya mayuya, bantu ke zonzaka yimbi ya bampangi, bantu yina ke lendaka ve kukutika banzutu ya bawu, mpe

bambeni ya bantu ya mbote.” *Bayayi* ke yina *bayango*, beno me mona. *Bayayi* ke yina *bayango*, ke kangisa bawu. Bambeni ya bayina *kele* mbote.

66 Oh, beno ke tuba, “Ba kele ba-Communiste, mpangi.” Oh, ve. Ve, ve.

67 “Bantu ke dasukaka na mbangu, bantu ya kuzola kyese kulutila na luzolo ya Nzambi, bantu ya mayuya, bantu ke zonzaka yimbi ya bampangi, bantu yina ke lendaka ve kukutika banzutu ya bawu, bambeni ya bayina kele mbote, na kuvwandaka na *mutindu* . . .” Nzingulu ya ba-dénomination, beno me mona. “Na kuvwandaka na mutindu ya kinzambi, kasi ke manga Ngolo ya yawu.”

68 Wapi kisika beno ke vwanda na kilumbu yayi? Beno me mona, “Na kuvwandaka na mutindu ya kinzambi.” Beno ke kwenda kaka na dibuundu na mutindu ya kinzambi mutindu beno lendaka vwanda, na Lumingi, mpe kulwata bakupe na Lumingu na manima ya midi, ke zenga matiti mpe ke basisa Oertel’s 92. Mpe pasteur ke basika mpe ke kunwa tabaka mpe ke vutuka, beno zaba. “Na kuvwandaka na mutindu ya kinzambi!”

69 “Mbote, pasteur, ba kele na dibuundu na zulu kuna, ba me tuba na munu ti mama mosi me beluka kilumbu yankaka yina na can- . . .”

“Hmm. Hmm. Buzoba! Bilumbu ya bimangu me lutaka.”

70 “Mbote, beno zaba yinki? Mu—mu—mu vwandaka kuna na dibuundu mosi ya fyoti nkokila yankaka yina, na mwa kisalu na yisi ya nsongi ya bala-bala, mpe ya vwandaka na muntu telamaka kuna, yandi vwandaka zonga, na . . .”

“Oh, chérie, kuvukana ata mbala mosi ve na kima ya mutindu yina. Ya kele bayimbwa ya yimbi. Oh! Kukota ve na yawu. Ya kele ba-exalté. Ti nge ata mbala mosi ve . . .”

71 “Na kuvwandaka na mutindu ya kinzambi mpe ke manga ngolo ya yawu, vwanda ntama na kima ya mutindu. Samu ti mutindu ya bantu yayi ke kwendaka yinzo na yinzo mpe ke twadisaka bakento ya bizoba yina kele ya kunatama na bansatu ya koso mutindu, bayina lenda ata mbala mosi ve kulongoka to kubakula luzabu ya Kieleka.” Ya kele kaka kieleka. Beno bawu yayi, kimvuka ya nsalasanani ya bamama, kimvuka *yayi*, *yina*. Dibuundu yango ya mawa kele na bimvuka mingi ti ya lenda mpe ve dyaka kulonga Nsangu ya mbote. Pasteur kele kaka na baminuti makumi zole, mpe kuna yandi fwana zonzila na kima yankaka. Beno me mona? Kana bawu sala ve, kimvuka ya badiakre ke kutana na yandi. Yinga, tata.

72 Oh, mpangi, yinki pasteur ya mbote fwana sala bubu yayi? Kaka kusala nyonso yina yandi lenda na kutelama mpe kuzenga bintala kisika bawu zola, mpe kubika matiti kubwa kisika bawu zola; mpe kulosa yawu kuna. Kaka yina. Yinga, tata. Ya kele

kieleka. Beno bika muntu ve—ve, beno longa kaka Ndinga mpe beno vwanda kaka na Yawu, beno kotisa kaka. Kana bawu losa beno na boloko, beno longa Yawu na boloko. Kana ba tula beno kisika yankaka, beno longa kisika nyonso beno ke kwenda; beno landila kaka na kukwenda, na kulongaka. Ya kele kieleka. Ntangu yayi, ya kele yina salamaka. Beno me mona, bawu ke na kukangisaka yawu.

⁷³ Ntangu yayi beto ke kuma na Nsungi ya Smyrne. Na nzila ya 8:

. . . na wanzio ya dibuundu na Smyrne sonika; Bima yayi me tubama na yina kele ya ntete mpe ya nsuka, yina wandaka ya kufwa, mpe kele moyo;

⁷⁴ Mu zola beno kutala konso ntangu ti Yandi ke kotisaka Yandi mosi na nsungi ya dibuundu, Yandi ke monisaka kima ya Bunzambi ya Yandi. Ya kele kima ya ntete Yandi ke mekaka na kutalisa na dibuundu, ti, ya kele Bunzambi ya Yandi. Yandi kele Nzambi! Beno me mona dyambu ya nene na ntama awa yina Irénée mpe bawu wandaka kuzwa mambu? Bawu mekaka na kutuba ti Nzambi na ba-cosmos tatu, mpe ya kele Nzambi na bantu tatu, mpe Nzambi na yayi. Yandi tubaka, “Ya kele ve na kima mutindu yina! Ya kele bisalu ya Moyo mosi, mpe ya kele Nzambi ya Ngolo nyonso.” Ya kele kieleka. Na yawu beno ve . . . bawu ntangu nyonso me kuzwaka yawu. Mpe Nzambi awa na mbandukulu ke na kukotisaka Yandi mosi na mosi ya Binzambi ya Yandi—ya Yandi. Beno me mona Yandi ke na kukotisaka Yandi mosi, na ntete awa, “Mu kele Yandi yina wandaka, yina kele, mpe yina ke kwiza. Mpe Mu kele ya Ngolo nyonso.” Awa Yandi ke banda kaka na Nsungi ya Smyrne ntangu yayi.

⁷⁵ Ntangu yayi beno kuwa Yandi, “Mu . . .”

. . . na wanzio ya dibuundu ya Smyrne (Mpe beto ke kwikila ti ya kele Irénée.) sonika; Bima yayi me tubama na yina kele ya ntete mpe ya nsuka, . . .

Beno me mona? Yandi me kotisa Yandi mosi, “Mu kele Nzambi, ntangu yayi, ya nsungi ya dibuundu yayi. Mu zola ve banzambi yiya to tanu pene awa. Mu—Mu kele Nzambi. Beno me mona, kaka yina.”

. . . yina wandaka ya kufwa, mpe kele moyo; (Amen!)

⁷⁶ Ntangu yayi, yina kele nkotolo. Ntangu yayi—ntangu yayi Smyrne zola kutuba “ndudi,” mpe ya me katuka na mpova mile—mile. Mpe dibuundu ya ntete—dibuundu ya ntete, mpe . . . me zimbisa zola ya bawu ya ntete, dibuundu ya Ephèse. Mpe dibuundu yayi bandaka na kuzwa “musisa ya ndudi” yina vwanda mata na bawu samu ti dibuundu yayi, dibuundu ya nene, kisika ya nene (mingi ya bawu, ntangu nyonso) wandaka bula na kuteleinaka lutwadusu ya Mpeve-Santu na dibuundu, mpe bawu wandaka zola kukitwadisa, bawu mosi. bawu wandaka zola kusala kinganga-Nzambi, bawu

vwandaka zola kusala mutindu salaka bantu ya Ngwisani ya Ntama. Bawu vwandaka sosa banganga-Nzambi. Mpe bawu . . . Kana banzambi ya mimpani, na ntangu yina kuna, kisika bawu ndimaka, bawu vwandaka na banganga-Nzambi mpe nyonso yina ya . . . ya Jupiter, mpe banganga-Nzambi ya Venus, mpe nyonso yina; bawu—bawu—bawu vwanda zola kukotisa bima mosi samu na kusala bantu *yayi*. Beno me mona, kima ya muvimba kele bumpuni na kubanda. Mimpani nyonso kele na banganga-Nzambi mpe nyonso ya mutindu. Kasi—kasi Dibuundu ya Nzambi ya moyo, ya kele nzenza na bawu. Klisto kele Nganga-Nzambi ya beto, Nganga-Nzambi ya beto ya Ntete. Beto kele na Nganga-Nzambi ya Ntete, mesa mpe yina beto ke kudyaka.

⁷⁷ Ntangu yayi, dibuundu yayi bandaka na kumenisa “musisa ya ndudi.” Samu na yinki? Ya vwandaka ndudi na bayina vwandaka zola kulandila na Mpeve-Santu. Zola kulumukaka, mpe bawu vwanda meka na kusobisa yawu na ba-credo mpe ba-dénomination, na kukwendaka ntama ya lutwadusu ya Mpeve-Santu. Beno banza na yawu! Ya kele samu na yina ndudi vwandaka na kati ya bawu. Mbote mingi.

⁷⁸ Ntangu yayi, dibuundu ya ntete, yayi . . . ndudi bandaka na kukota na malembe. Na dibundu ya zole, fyoti mingi. Mpe, na nsuka, ya kotaka kaka samu ti bawu vwandaka “sala dibuundu ya kulutula mbote”; bawu banzaka ti bawu vwandaka. Kaka awa bawu kuzwaka kima ya kulutula lukumu, bantu ya Rome zolaka kota. Samu na yinki? Bawu vwandaka na pape, bawu vwandaka—bawu vwandaka na bantu ya nene, ba-cardinal, mpe nyonso yina. Bawu vwandaka lwata mbote. Bawu kwendaka ntama ya makelele nyonso mpe ya nyonso vwandaka na bawu; na swi ya kieleka. Ya ke talisa ti bawu vwanda kufwa. Uh-huh. Uh-huh. Bawu vwanda kufwa. Mpe na yawu bawu kuzwaka ya kulutula lukumu mpe bawu salaka nzutu ya kulutula mbote. Kima ya ntete na zulu awa, bawu kuzwaka kima ya muvimba na dibuundu ya nene ya dénomination, dibuundu ya Katolika ya Rome ya Bantu nyonso, Dibuundu ya Katolika ya Rome na Nsungu ya Mudidi. Mbote, kuna, bawu kuzwaka bantu ya lukumu, mpe bawu vwandaka ya kalasi.

⁷⁹ Oh, ya vwandaka mingi kitoko kulutula na ntangu bawu vwanda telamaka na ngaanda na bala-bala, “mpe vwanda yenga-yenga na bampusu ya mameme mutindu na ya bankombo, mpe bantu ya mputu, mpe ya kuzenga na scie, mpe—mpe ba vwanda seka bawu, mpe vwandaka talisa bawu nsoni,” mpe mutindu Paul kutubaka na Hébreux kapu ya 11.

⁸⁰ Mbote, dibuundu ya nene yayi, ya nene, ya kulwata mbote, na ba-jupon, mpe—mpe kima nyonso yankaka yayi yina bawu ke lwataka ya mutindu. Kieleka, ya ke talana mutindu ya lukumu, “tata, Révérend, Mulongisi, Tata *Kingandi*.” Oh, la la! Mutindu bawu ke nangula “mapapu,” kuna.

⁸¹ Kasi, beno me mona, ya vwandaka kima ba me vukisa. Yina ba me vukisa! Beno me mona, ya vwandaka ve na ata Luzingu na kati ya yawu. Mpe bawu lenda dyaka ve kuvutuka manima, ya kele samu na yina bawu ke telama dyaka ve. Réveil ya ba-Luthérien kutelamaka dyaka ve. Réveil ya Wesley kutelamaka dyaka ve. Réveil ya ba-Nazaréen kutelamaka dyaka ve. To dyaka ke telama dyaka réveil ya Pantekote. Samu na yinki? Samu ti beno kufwaka yawu. Beno me vukisa yawu na yinza, na dibanza ya ba-Nicolaïte, na kubikaka ve Mpeve-Santu kuzwa nzila ya Yawu. Ya kele kieleka. Beno me vukisa dibuundu, mpe ya lenda dyaka ve kubuta yawu mosi. Ntangu beno ke buta, beno ke kuzwa ba-Méthodiste mingi; ba-Baptiste ke buta, ke kuzwa ba-Baptiste mingi; Katolika ke buta, ke kuzwa Katolika mingi; beno ke kuzwa kima mosi beno ke katula na mbuma na dititi ya blé. Kasi beno bika munu kutuba kima; ntangu Mpeve-Santu ke vutukaka, Yawu ke nataka mbutukulu ya *malu-malu* mpe Luzingu ya *malu-malu*; kundima. Mbotika ya Mpeve; ke vutulaka dyaka Dibundu na yawu mosi, ke vutula Luzingu na kati ya yawu.

⁸² Disangu ba me vukisa kele ve na luzingu na kati ya yawu. Luzingu yina kele na yawu, kele kaka pene ya kufwa. Ntangu yayi, beto ke kota na yawu na Nsungi ya Mudidi kuna, “Yina fyoti kele na beno, beno kangama na yawu,” Yandi tubaka. Bawu kangisaka yawu nyonso na kutala. Ntangu yayi ya ke butama dyaka ve yawu mosi. Ntangu yayi, . . .

⁸³ Kasi Nzutu ya Yesu Klisto kele ve—kele ve organisation. Nzutu ya Yesu Klisto kele Nzutu ya misitiki, ya kele Nzutu ya . . . na Kimfumu yina kele Kimfumu ya kimpeve yina kele na zulu ya ntoto na nzila ya Yesu Klisto na kuvwandaka Ntinu ya Kimfumu yayi, Nganga-Nzambi ya Ntete samu na kupesa minkayulu samu na nzyetolo na Kimfumu yayi. Yandi kele Profete (Ndinga) yina ke longaka Kieleka mpe ke nataka Nsemo ya Nzambi na Kimfumu yayi; mpe Yandi kele Profete, Nganga-Nzambi, mpe Ntinu, na Kimfumu yayi. Mpe wapi mutindu beto ke kota na Kimfumu yayi? na dénomination? na mukanda? na kupesana diboko? Kasi “na Mpeve mosi beto nyonso kele ya kubotama na kati ya Nzutu mosi” yina kele Nzutu ya misitiki ya Yesu Klisto, mpe beto kele ya kubotama na kati kuna, ve na maza, ve na kutsyamuna ya mwa maza, ve na kulosaka maza, ve na mutindu mosi ya maza ya mbotika, kasi “na Mpeve mosi, Mpeve-Santu, beto nyonso kele ya kubotama na kati ya Nzutu mosi,” Ba-Corinthiens ya Ntete kapu 12. Yinga, beto kele ya kubotama na kati Nzutu yayi na nzila ya Mpeve mosi, Mpeve-Santu, na yina beto kele ve ya kima kasi ya Klisto. Beno kele ya Klisto. Ya kele Kimfumu ya misitiki ya Nzambi yina ba me tula, ti beto ke kota na kati ya Yawu na nzila ya mbotika ya Mpeve-Santu. Mu zola Yawu! Hmm!

Ya kele pene na bisika nyonso bantu,
Bayina bantima kele nyonso na tiya

Na Tiya yina kubwaka na Pentecote,
 Yina sukulaka mpe vedisaka bawu;
 Oh, Ya ke na kupela ntangu yayi na kati ya
 ntima ya munu,
 Oh, nkembo na Nkumbu ya Yandi!
 Mu kele na kyese mingi ti mu lenda tuba ti mu
 kele mosi ya bawu.

Mu kele mosi ya bawu, mu kele mosi ya bawu,
 Mu kele na kyese mingi ti mu lenda tuba mu
 kele mosi ya bawu; (Alleluia!)
 Mosi ya bawu, mu kele mosi ya bawu,
 Ntangu yayi mu kele na kyese mingi ti mu
 lenda tuba mu kele mosi ya bawu.

Ata ti bantu yayi longokaka ve, (Doctorat
 ya Droit, Doctorat ya Philosophie. Beno me
 mona.) . . . ti ba longokaka ve,
 To kuzabana ya yinza na lunangu,
 Bawu nyonso me kuzwa Pantekote ya bawu,
 Me botama na Nkumbu ya Yesu;
 Mpe bawu ke na kutuba ntangu yayi, bisika
 nyonso,
 Ngolo ya Yandi kele dyaka mosi,
 Mu kele na kyese mingi ti mu lenda tuba ti mu
 kele mosi ya bawu.

Beno kele na kyese ve? Yinga, tata. Kaka mosi ya bawu.
 Kaka yina.

⁸⁴ Mu ke bambuka moyo ke na kutambulaka na Memphis, mwa
 mama yina, ya ndombi na yintu ya yandi ya kutengama kuna.
 Yandi tubaka, “Mbote, pasteur.”

Mu tubaka, “Wapi mutindu nge me zaba ti mu vwandaka
 pasteur?”

Yandi tubaka, “Mfumu tubaka na munu, ‘Pasteur ya Munu
 ke luta na bala-bala, ke vwanda ya kulwata yimpu ya mbwaki, ya
 kusimba sanduku.’” Yandi tubaka, “Mu zabaka ti nge vwandaka
 yandi ntangu mu monaka nge kukwiza.” Beno me mona? Oh,
 kento vwandaka mosi ya bawu. Ya kele kieleka! Oh, mutindu
 Nzambi kele mbote!

⁸⁵ Ntangu yayi mu banza ti kima . . . [Mpangi Branham ke
 na kutangaka note ba me pesa yandi—Mu.] “Mwana ya fyoti
 ya kento yina—yina nge sambilaka, Lumingu na nkokila, yina
 katukaka na Bedford, mutindu ti me kufwa kaka. Yayi lenda
 ve . . . Lemvo ya nge sambila.” Mwana ya fyoti ya kento yina
 beto . . . yina awa ba sambilaka awa Lumingu na nkokila,
 katukaka Bedford, “me—me kufwa kaka,” bawu me tuba. Beto
 sambila:

⁸⁶ Mfumu Yesu, mu ke sambila ti na mutindu nyonso, na
 mutindu mosi, Mfumu, ti bisambu ya beto kukwenda na mwana

yina. Beto me pesa mwa kivangu yayi na Nge, Tata ya beto Nzambi. Mpe beto ke banza na bantu yango yina vwandaka awa mpe vwandaka sambila mpe lombaka kisambu samu na mwana ya fyoti ya kento yina. O Tata Nzambi, mu ke lomba ti—ti nsangu yayi kuvwanda ve ya kieleka, Tata; beto zaba ve, kasi mu ke sambila ti Nge ke tala kyadi mpe ke pesa ngolo mpe ke bika kivangu ya fyoti yayi kuvumbuka mpe kuzinga samu na nkembo ya Nzambi. Na Nkumbu ya Yesu Klisto beto me lomba yawu. Amen. Ti Mfumu Yesu kubwela balusakumunu ya Yandi.

⁸⁷ Ntangu yayi, dibuundu. Ntangu yayi, nkumbu ya dibuundu kele ya kuvukana na kikalulu ya nkadulu ya yawu. Beno me tala *Smyrne* kuzola kutuba “ndudi”? Mpe beno me tala mosi na mosi ya dibuundu ntangu yayi, ya kele nkumbu ya dibuundu kele na kima ya kusala na nkadulu ya dibuundu. Mu lendaka tuba kima mosi awa; kasi mu ke sala mbote na kutuba ve, samu ti beno ke tala munu yimbi. Beno me mona?

⁸⁸ Nkumbu ya beno, mpe. Beno lendaka zaba yawu ve, kasi ya kele. Oh, yinga. Beno ke tuba ntangu yayi, “Ya kele numérologie.” Ve, ya kele ve. Ntangu Jacob kubutukaka ba bokilaka yandi *Jacob* yina vwanda “muntu yina ke bakaka kisika ya bampangi,” kasi ntangu yandi nwanaka na Wanzio, Nzambi sobaka nkumbu ya yandi na *Israël*, “mwana ya ntinu.” Ya kele kieleka? Saul vwandaka “Saul ya Tarse,” muntu ya yimbi; kasi, ntangu yandi kwizaka na Yesu, ba bokilaka yandi “Paul.” Nkumbu ya Simon vwandaka “Simon”; kasi ntangu yandi kwizaka na Yesu, ba bokilaka yandi *Pierre*, “ditadi ya fyoti.” Oh, yinga, tata. Na... Nkumbu ya beno ke vukanaka na yina beno kele... Ya kele na kidimbu na zulu ya nkadulu ya beno.

⁸⁹ Mpe dibuundu yayi vwandaka ya kubokila *Smyrne* samu ti ya vwanda kufwa. *Smyrne* zola kutuba “ndudi.” Na nzonzolo yankaka, musisa ya ndudi vwandaka mata mpe vwandaka kangisa yawu, ya vwandaka landa nzila ya yawu na kubasika mile. Ya kele na yina bawu ke kusaka bamvumbi, na mile, beno me mona. Ya vwandaka mile, ndumbu, mutindu mafta. Ba vwanda sadilaka mile samu—samu na kupakula bantu ya kufwa na manima bawu me tula mananasi na nzutu ya bawu, mpe nyonso yina. Ya kele ya kuvukana na lufwa, mpe dibuundu vwanda kufwa.

⁹⁰ Mpe, oh, beno lenda mona ve, bubu yayi, bankundi, mouvement ya nene ya Pantekote yina kuzwaka Luzingu bamvula fyoti me luta, beno ke mona yawu ve me vwanda ya kupakula ntangu yayi na mile? Beno me mona? Kupakula mosi yina vwandaka na dibuundu yayi *awa* me kwenda na yisi mpe me pakula yandi yayi na yisi *awa*; ke na kufwaka samu bawu ke na kuvutukaka na mataba ya mabuundu, mpe na kukatulaka bansantu, dizwela ya bawu ya mpembe. Nkonga ya fyoti yina telamaka ngwi kuna, mpe Mpeve-Santu ya kieleka,

zonzaka na bandinga, mpe Nzambi monisamaka. Mpe, mpangi, bawu vwandaka ya kusungama mutindu mpe, “ya kalasi ya mbandukulu.” Kieleka bawu—bawu vwandaka kieleka, beno zolaka sala bawu kivuvu kisika nyonso. Ntangu yayi beno zaba ve na yinki ya kusala kivuvu mpe na nani kusala kivuvu. Beno me mona? Ya kele na kima mosi me salama. Kima salamaka. Yinki ya kele? Bawu me kuzwa kupakulama ya mile, ya ndudi. Na kutelamaka. Mosi . . .

⁹¹ Yinki me sala yawu? Mosi me kwiza, ya vwandaka na dibuundu ba bokilaka, ya ntete, vwandaka Lukutakanu ya Nene. Kuna bawu bokilaka yawu ba-Assemblée de Dieu. Na ngaanda ya ba-Assemblée de Dieu me kwiza Dibundu ya Nzambi. Na Dibundu ya Nzambi, kuna bawu bandaka na kutala na kizunga, tubaka, “Beno kele ba-Assemblée.” Bayankaka vwandaka tuba, “Beno kele Dibundu ya Nzambi.” Na manima ya yawu kwizaka Eglise Pentecôtiste de Dieu Unifiée, na manima ya kuwisana ve. Mpe na manima, kima ya ntete beno zaba, na kisika ya kundima Nsemo mpe kutambula na kati ya Yawu, mbote, bawu bongisaka bawu mosi tii bawu zolaka ve kundima Nsemo.

⁹² Ntangu yayi, ntangu mbotika na Nkumbu ya “Yesu Klisto” kunatamaka na kisika ya “Tata, Mwana, mpe Mpeve-Santu” na ba-Assemblée de Dieu, bawu kangamaka yimeni na bawu mosi na yawu bawu zolaka ve kusoba yawu. Mpe bawu zaba Yawu kele Kieleka! Mu ke telemina muntu nyonso ya bawu na kutalisa ti Yawu kele ve kieleka landila Biblia. Kieleka Yawu kele Kieleka. Kasi yinki bawu lenda sala? Bawu lenda sala yawu ve. Beno me mona, bawu ke pasula credo ya bawu, bawu lenda ve.

⁹³ Na manima yinki salaka ba-Unitaire? Na kisika ya kundima Yawu mpe kukwendaka na ntwala, bawu kumaka kilo: “Lusakumunu na Nzambi kukondwa nsuka! Beto kele na Nsemo, mpe beno kele ve. Beto kele . . .” Yinki bawu salaka? Bawu bongisaka yawu. Beno lenda ve kubongisa Nzambi. Nzambi kele ya kukondwa mutindu, Biblia ke tuba. Ve, ya kele ve na kima ya kukangama na Nzambi.

⁹⁴ Ntangu yayi, kuna ba-Assemblée mekaka na kubongisa Yandi mpe kusala bawu . . .ya bawu . . .Dibuundu ya bawu ya kieleka. Mpe na manima kwizaka ba-Unitaire, bawu mekaka na kubongisa ya bawu, mpe bawu “kuzwaka Nsemo ya kulutila.” Na yawu yinki bawu salaka? Bawu kufwaka yawu na munimi ya bawu, na mutindu ya ndudi yina bawu lutilaka na yawu. Na kisika ya kupesaka yawu na mungwa mpe mbote, bawu mekaka na kubundana ve na yankaka yina, bawu vwandaka ve na kima ya kusala na yandi. Mpe ya kele yina salaka yawu. Ya me landila, kuna. Beno zaba kima ya ntete, kuna me kwiza mosi yankaka, bawu kuzwaka *yayi*, mpe ntangu yayi bawu me kabuka. Mosi tubaka, “Yandi ke na kwizaka na zulu ya mpunda ya mpembe.”

Yankaka yina ke tuba, “Yandi ke na kwizaka na zulu ya dituti ya mpembe. Lusakumunu na Nzambi, mu ke banda samu na munu organisation na zulu awa.” Beno me mona mutindu bawu ke sala? Ya ke kutsyamuna mile—mile. Yinki yawu salaka? Ya sukisaka kimpangi.

⁹⁵ Mingi ya bakento, ya babakala, na nkokila yayi, na ba-Assemblée de Dieu, ke zola kukwiza mpe kuzwa mbotika na Nkumbu ya Yesu Klisto, na kuzabaka ti Yawu kele Kieleka ya Nzambi. Ba ke basisa bawu kana bawu sala yawu.

⁹⁶ Mpe mingi ya ba-Unitaire ya...Ntangu yayi, mu kele Unitaire. Mu ke kwikilaka ve na “bu-unitaire” na mutindu bawu ke salaka. Mu ke kwikilaka ve na *Yesu* mutindu bawu ke tubaka, “*Yesu*”; ya kele na ba-Yesu mingi. Ya kele *Mfumu Yesu Klisto*. Ya kele kieleka. Ntangu yayi, mpe mu ve. . . Mu ke kwikilaka mutindu yankaka na mutindu bawu ke salaka. Bawu ke botikaka na Nkumbu ya Yesu, na Nkumbu ya Yesu samu na kubutuka ya malu-malu, ti “Na kubotamaka (kubutuka ya malu-malu) ke nata Klisto na beno na maza ya mbotika.” Mu ke kwikila yawu ve. Mu ke kwikila ti kubutuka ya malu-malu ke kwizaka na Menga ya Yesu Klisto na nzila ya Mpeve-Santu. Ya kele kieleka. Mbotika kele kaka kisalu ya ngaanda ya kisalu ya kati ya kubutuka ya malu-malu yina salamaka. Beno me mona? Na yawu, mu ke wisana ve na yawu. Ya kele nyonso ya kulunga, kasi bawu nyonso kele bankundi ya munu.

⁹⁷ Ntangu mu bandaka ntete mutindu mulongi ya Baptiste, bawu vwandaka kwiza na kutubaka, “Mpangi Branham, kwiza awa, beto—beto—beto kele na Yawu mpe beto me nata Yawu awa.”

⁹⁸ Mu tubaka, “Ata mosi ya beno, mu ke telama kaka na kati-kati ya bankonga nyonso zole mpe ke tuba, ‘Beto kele bampangi!’” Mu ke kipe yina ve, mu ke kipe ve kana muntu ke wisana ve, ya ke sala munu ata ditona mosi ya luswaswanu, yandi kele dyaka mpangi ya munu.

⁹⁹ Mu kele na mpangi ya bakala yina ke zolaka tarte ya pomme; mu ke zolaka tarte ya cerise, kasi mu ke bika ve na kubundana na yandi. Yandi lendaka kudya tarte ya yandi ya pomme mpe munu kudya tarte ya munu ya cerise. Mpe mu ke tula na zulu ya ya munu *mante ya mwana ya ngombe*, kana yandi zola yawu ve, mbote, yandi lenda kuzwa yawu. Beno zaba yawu. . . Yinki ya kele? Kima ba ke bulaka yina bawu ke tulaka na zulu ya yawu, beno zaba, “crème ya kubula.” Mu ke zolaka yawu. Mu me kuma mingi kuluntu samu na kudya yawu, kasi ya kele. . . Kasi mu—mu—mu. . . Ya kele yina mu ke zolaka. Kana yandi ke zolaka yawu ve, yandi fwana kudya yawu ve. Ya kele nyonso ya kulunga, mu ke kudya ya munu. Kasi yandi kele dyaka mpangi ya munu! Ya kele kieleka.

¹⁰⁰ Mpe na yawu mu—mu zola yawu, mu zola kubundana. Kasi ntangu beto ke salaka bandilu mutindu yayi, mpe ke tuba, “Ve, yayi kele dénomination *ya beto*,” mpe lenda kwiza ve mpe kupesa maboko na muntu yankaka, mpe kutuba, “Lusakumunu na Nzambi, mpangi!” Oh! Ya kele yina beno ke bokila kubundana. Kana beno sala ve, beno ke kuzwa musisa yango ya ndudi kaka mutindu bantu ya Smyrne na ntama kuna, mpe beno ke sala kima mosi. Mbote mingi, na yawu nkumbu ya bawu vwandaka “ndudi.”

¹⁰¹ Ba-Nicolaïte landilaka na kukangisa bawu tii Bansungi ya Mudidi. Nsungi ya Luther nataka kitezo ya ntete ya lemvo, Nsemu ya fyoti bandaka na kulezima. Kuna na manima ya yawu kwizaka, me kwiza John Wesley na kusantisama, ya kumaka fyoti mpwelele. Mpe na manima me kwiza mbotika ya Mpeve-Santu na bantu ya Pantekote, na kuvutulaka dyaka lukwikilu ya batata. Kasi bawu lendaka ve na kubika yawu mutindu yina, na yina bawu zolaka kubongisa yawu, mpe kuna bawu bandaka kaka na kuvutuka dyaka na bu-Nicolaïte. Kaka mutindu yina Biblia ke tuba ti bawu ke sala.

¹⁰² Ntangu yayi, mu fwana tala mbote awa to mu ke baka yawu . . . ntangu mingi. Beto baka nzila ya, to . . . ya kele ya 8, nzila ya 9. Mbote mingi, ntangu yayi ba monisaka bawu mpasi, nzila ya 9:

Mu zaba bisalu ya nge, mpe balukwamusu ya nge, . . . bumputu, (kasi nge kele mvwama) . . . (Oh, la la!) . . . mu . . . (Awa Yandi ke na kuzonzilaka na Dibuundu ntangu yayi, Dibuundu ya kieleka, bayankaka ve; bawu yinaka bisalu yango ya ba-Nicolaïte.) . . . mu zaba kuvwenza ya bawu yina ke tubaka ti bawu kele ba-Juif, mpe kele ve, kasi bawu kele synagogue ya Satana.

¹⁰³ Ntangu yayi, bawu vwanda bokuta. Bawu kubwaka na bumputu. Na . . . Bawu bakaka nyonso vwandaka na bawu. Bawu tungaka dibuundu ya bawu ya fyoti mutindu yayi, mpe na kuvwandaka yina bawu vwandaka mutindu mosi ya nkonga ya fyoti mingi, ba losaka bawu na ngaanda, dibuundu ya nene, kangisaka kaka bawu. Mpe Yandi tubaka, “Mu zaba. Mu zaba ti beno fwana kutana na yisi na nsongi, beno ke kutana na bala-bala, to kisika nyonso yankaka yina beno lenda.” (Mpe mu kwendaka na ba-catacombe kisika bawu zolaka kuna; kukwenda na yisi ya ntoto mpe kukutana, mpe nyonso kuna.) “Mu zaba balukwamusu ya nge, mpe Mu zaba bampasi ya nge, mpe nyonso yankaka ya mutindu yina, kasi nge me kuma mvwama na nzila ya balukwamusu yango.” Oh, la la! Beno tuba na munu ntangu nyonso kutalisa mpasi ke kwizaka na zulu ya Dibuundu, ya ke pesaka Yawu ngolo. Ntangu nyonso ya ke pesaka ngolo na Dibuundu, na balukwamusu. “Mu zaba balukwamusu ya nge, kasi nge kele mvwama.” Samu na

yinki? “Nge me kangama na Munu; nge kele mvwama. Kasi balukwamusu ya nge ke na kutalisaka nge mpasi ve.”

¹⁰⁴ Ntangu yayi, na . . . Beno me tala? Ba-Nicolaïte me kuzwa samu na bawu mosi synagogue ntangu yayi. Biblia ke tuba yawu awa. Beno me tala yawu awa na nzila ya 9?

Kisika . . . yina . . . kele ve, kasi kele synagogue ya Satana.

¹⁰⁵ Uh-huh, ba me losa na ngaanda Dibuundu ya kieleka. Ba-Nicolaïte me baka kisika ya zulu, mpe . . . bawu me losa na ngaanda bantu yina vwandaka na Mpeve-Santu, na yawu kuna bawu—bawu vwandaka na ata nsatu ya bawu. Kana Smyrne, na Asie, zabaka kaka ti bima . . . ti bayimpu ya bambangi ke vingila bawu, bawu zolaka ningana. Beno me mona? Ntangu yayi, na nzonzolo yankaka, yina . . . ntangu profesi yayi kusonamaka mpe ba me fidisa, mpe dibuundu me kuzwa yawu, mpe bawu monaka bawu vwandaka bayina ke kwenda lwata yimpu ya bambangi, mbote, bawu zolaka . . . mbote, ya pesaka bawu boma ya lufwa. Bawu vwandaka tala ntangu nyonso na yawu. Ya kwizaka ve na nsungi ya bawu. Mpe mu banza ti mosi ya bawu tubaka, “Mbote, beno zaba—beno zaba, mu ke tuba na beno, profete yina vwandaka na foti. Jean vwandaka na foti, yandi—yandi . . . samu ti ya salmaka ve na beto awa na Smyrne.” Mbote, ya zolaka vwanda bankama ya bamvula na ntwala. Beno me mona? Kasi ntangu Nzambi ke zonzaka kima, ya fwana salama.

¹⁰⁶ Ya kele kisika beto ke kotisaka lukwikilu ya beto, kaka kuna na Ndinga ya Nzambi. Nzambi ke zitisaka konso nsilulu. Ata nyonso . . . Beno lenda banza ti ya fwana salama kaka awa, kasi ya lendaka vwanda ve ntangu ya Nzambi samu yawu kusalama. “Kasi Ndinga ya Munu ke vutuka ve na Munu ya mpamba, kasi Yawu ke sala yina ba kanisaka Yawu kusala.” Nzambi ntangu nyonso ke zitisa Ndinga ya Yandi, mpe na ntangu ya mbote ya Yandi Mosi Yandi ke yonzika.

¹⁰⁷ Na yawu bantu yayi vwandaka bayina, na dibuundu ya ntete, kasi na dibuundu yango vwandaka na mutindu yina ke basika na dibuundu ya Smyrne na ntwala. Ntangu yayi, na manima bawu zola lwata yimpu ya bambangi, mingi ya bawu zola kufwa.

¹⁰⁸ Ntangu yayi beto baka nzila ya 10, na yina beto ke tanga yayi:

Kuvwanda na boma ve ya bima yayi (synagogue ya Satana) yina nge ke tala mpasi: tala, dyabulu ke losa . . . beno na boloko, ti beno lendaka vwanda ya kumekama; mpe ti beno ke kuzwa lukwamusu bilumbu kumi: vwanda ya kukwikama tii na lufwa, mpe mu ke pesa nge yimpu ya luzingu.

¹⁰⁹ Oh, la la! Ba tubaka na bawu na kuvwanda na boma ve ntangu ba zolaka bokila bawu samu na kufwa samu na nsambulu ya bawu—ya bawu. Ntangu yayi, Mpangi-kento Wood, ata kisika

nge kele, mu banza ti yayi ke sadisa nge. Mpangi-kento Wood vwanda tuba na munu, kilumbu yankaka yina, yandi vwanda lenda ve kubakula samu na yinki ti bayankaka lenda vwanda ya kukula mpe bayankaka ve. Bantangu yankaka beno fwana zaba. . . Nzambi tubaka na bantu yayi, “Ntangu yayi, beno vwanda na boma ve ya yawu, samu ti Satana ke losa beno na kati kuna, samu ti nkonga ya ba-Nicolaïte yayi yina ke kwiza mpe ke kotisa beno, samu ti Mu ke bika beno kufwa samu na dyambu ya Munu. Kasi Mu ke pesa beno yimpu ya Luzingu na kilumbu yina.” Na yawu ve. . .

¹¹⁰ Ntangu yayi beno tala mbote, Yandi tubaka. . . Ntangu yayi, kana beno tala mutindu beto ke tanga nzila ya 10 yayi. Beno bika mu tanga dyaka yawu:

Kuwanda na boma ve ya bima yayi yina nge ke tala mpasi: tala, dyabulu ke losa bayankaka ya beno na boloko, ti beno lendaka vwanda ya kumekama; mpe beno ke kuzwa lukwamusu bilumbu kumi: kasi vwanda ya kukwikama tii na. . . (Beno me tala ya kele tii? Ve tii lufwa, kasi “na” lufwa. Beno me bakula yawu?) . . . vwanda ya kukwikama tii na lufwa, . . . (Beno me mona? Mpe bawu salaka.)

¹¹¹ Ntangu yayi Yandi tubaka, Satana. . . Beno talaka nani Yandi—nani Yandi tulaka mutindu muntu yina vwandaka sala yawu? Ntangu yayi, *synagogue ya Satana* yayi vwandaka “Ba-Nicolaïte.” Beto zaba yawu. Ya vwandaka ve? Kuna ya vwandaka organisation, kinganga-Nzambi yina vwandaka telama yina zolaka sala bantu yayi ba monisaka mpasi, ya zolaka sala ti bantu yayi kumona mpasi, mpe bawu vwandaka ya kukwikama na Nsangu ya mbote *tii* lufwa. Beno ke talaka na mukembo ya makwela? ve *ntete* lufwa kukabula beto, kasi “*tii* lufwa ke kabula beto.” Beno me mona? Ntangu yayi, *tii* mpe *ntete* ya kele na luswaswanu. Ntangu yayi, ba zolaka vwanda ya kukwikama na Klisto *tii* lufwa. “Tatamana *tii* lufwa na yawu. Kuwanda na boma ve, samu Mu ke pesa nge yimpu.”

¹¹² Ntangu yayi “bilumbu kumi” yayi yina bawu ke zonzila awa, bilumbu kumi. Kilumbu mosi na Biblia ke monisa mvula mosi. Mpe *bilumbu kumi* vwandaka “bamvula kumi” ya nsuka ya kimfumu ya D-i-o-c-l-é-t-i-e-n, Dioclétien. Dioclétien. Dioclétien, ya vwandaka mfumu yango ya nsuka yina yalaka na ya nsuka. . . Mbote, ya kele na bamfumu mingi yina yalaka na ntangu ya Nsungi ya Dibuundu ya Ephèse. Mpe Néron, mu banza, vwandaka mosi. Mpe Dioclétien yayi awa vwandaka muntu ya nsuka yina yalaka, na bamvula kumi ya nsuka, mpe yandi vwandaka muzombi lutila kubasisa menga na bawu nyonso. Yandi bakaka kaka lweka na nkonga yayi mpe bawu—bawu basisaka menga ya Miklisto, mpe kufwaka bawu, ba yokaka bawu na tiya, ba—ba salaka nyonso, mpe ya vwandaka bamvula kumi ya kulutila ba monisamaka mpasi ya kubasisa

menga. Mpe ntangu ya yandi mpe kimfumu ya yandi vwandaka kubanda mvula 302 tii mvula 312. Ya sukisaka Nsungu ya Smyrne, na kukota ya Constantin. Mpe yandi kwizaka na mvula 312, Constantin kwizaka. Ya vwandaka bilumbu kumi ya balukwamusu. Mpe ya bandaka na Néron mpe sukaka na Dioclétien. Mpe ya bandaka na Néron, ya vwandaka pene ya mvula ya 64 na manima ya Yesu ntangu Néron bakaka kiti ya kimfumu.

¹¹³ Ntangu yayi, nzila ya 11 kele nsilulu. Ntangu yayi beto ke baka yayi kaka ntete beto sukisa:

Yandi yina kele na dikutu, ti yandi kuwa yina Mpeve ke tuba na mabuundu; Yandi yina ke nunga ke tala ve mpasi ya lufwa ya zole.

¹¹⁴ Ntangu yayi, mu ke tuba kima mosi awa, yina kele na nzila. . . Kana mu me banza yawu, na ntima ya munu, mpe ti mu tubaka yawu ve, kuna mu kele muntu ya luvunu. Beno me mona? Mu zola beno kutala kima mosi awa na Masonuku yayi, mpe mu banza ya vwandaka mosi ya kingana ya kulutila nene samu na munu na bamvula mingi tii ntangu mu monaka yawu. Ntangu yayi ti beto tanga yawu kieleka mbote, ntangu yayi. Beno me mona?

Yandi yina kele na dikutu, (Na bampova yankaka, “kele na dikutu ya kuwa,” beno me mona, ya kele kuzibuka na Mpeve.) ti yandi kuwa yina Mpeve ke tuba na mabuundu; . . .

Ntangu yayi beno me mona, kima mosi yayi, kumonisama mpasi yayi mpe nyonso kwizaka. Konso kitini ya yawu kubulaka na zulu na konso dibuundu. *Mabuundu.*

. . . Mpeve ke tuba na mabuundu; Yandi yina ke nunga. . . (Na wapi dibuundu? ya Ephèse? Yinga. Mbote mingi. Smyrne? Yinga, nyonso ya bawu.) . . . Yandi yina ke nunga na mabuundu nyonso ke monisama mpasi ve ya lufwa ya zole.

¹¹⁵ Yandi na dibuundu ya Laodicée kunungaka yinki? Yandi nungaka ba-Nicolaïte, nungaka bima ya yinza, nungaka ba-dénomination yayi, nungaka bakingang-Nzambi yayi, nungaka nyono ya yinza mpe tekaka, mpe zolaka Klisto. Beno ke tala ve mpasi ya lufwa ya zole. Samu na yinki? Yandi kele na Luzingu ya Kukonda nsuka. Luzingu ya Kukonda nsuka lenda kufwa ve. Yesu tubaka, “Yandi yina ke kuwa Munu kele na Luzingu ya Kukonda nsuka, ke kufwa ata mbala mosi ve. Mu ke vumbula yandi na kilumbu ya nsuka.”

¹¹⁶ Ntangu yayi, ntangu yayi, kuna. . . Ntangu yayi, beno ke. . . Mingi ke ndima ve na yayi, kasi mu zola beno kubanza kieleka mbote ntete beno balka lukanu. Beno me mona? Mu ke tuba kima mosi ntangu yayi:

117 Ya kele samu na yina mu ke kwikilaka ve ti ya kele na difelo ya Seko. Ya lenda vwanda ve na difelo ya Seko. Samu ti kana ya vwandaka na difelo ya Seko, kuna ya vwandaka ntangu nyonso na difelo ya Seko, samu Seko. . . Ya kele kaka na mutindu mosi ya Luzingu ya Kukonda nsuka, mpe ya kele yina beto ke na kunwanaka. Mpe kana beno ke nyenga ntangu nyonso mpe Kukonda nsuka, kuna beno fwana kuzwa Luzingu ya Kukonda nsuka yina ke zika na tiya, mpe kuna ya ke vwanda Nzambi ke na kuzika na tiya. Beno lenda vwanda ve na difelo ya Kukonda nsuka, mpe Biblia ke tuba pwelele ti “difelo vwandaka ya kuvanga.” Mpe kana ya kele ya kuvanga, ya kele Seko ve. Nyonso yina kele Seko kuvangamaka ata mbala ve; ya vwandaka ntangu nyonso, ya kele Seko. Mpe Biblia ke tuba ti “Difelo kuvangamaka samu na dyabulu mpe bawanzio ya yandi.” Difelo kuvangamaka, ya kele Seko ve. Mpe mu ke kwikilaka ve ti muntu ke vwanda ya kusemba ya Seko.

118 Mu ke kwikila ti Biblia ke tuba awa pwelele, ti, “Yandi yina ke nunga ke tala ve mpasi ya lufwa ya zole.” Ntangu yayi “lufwa.” Mpova *lufwa* me katuka. . . kele yayi, kele “kukabuka.” Ntangu yayi, ntangu beto me kabuka na Nzambi, na disumu, beto kele yimeni ya kufwa; Biblia me tuba yawu. Beto kele nzenza na Nzambi, beto me kabuka, beto kele ya kufwa na disumu mpe mambu ya yimbi; beto kele nzenza na Nzambi mpe na yinsi ya Yandi. Mpe kuna ntangu beto ke yamba Nzambi mpe me kuzwa Luzingu ya Kukonda nsuka, beto kele bana ya Yandi mpe ndambu ya Yandi.

119 Mwana ya munu ya bakala ya fyoti kuna, Joseph, kele ndambu ya munu, ata nyonso yina mu. . . nyonso yandi ke sala. Yandi. . . mu lendaka. . . Yandi lenda vwanda ve. . . Kana mu vwandaka muntu ya bimvwama ya nene mpe ti vwandaka na difwa mingi, yandi lendaka, yandi ke byadila mpe nyonso; kasi yandi kele dyaka mwana, yandi kele ndambu ya munu. Kieleka, yandi kele ndambu ya munu. Ntangu yayi, mu lendaka manga yandi ve kulutila na mu lendaka manga munu mosi, samu ti yandi kele ndambu ya munu. Kizama ya menga ke talisa ti yandi kele ya munu. Beno me mona?

120 Mpe kizama ya Menga ke talisa kana beno kele ya Nzambi to ve. Beno me mona? Beno kele bana ya Nzambi mpe beno kele na Luzingu ya Kukonda nsuka. Kasi moyo yina ke sumuka, *mwela* yango ke vwanda ya kukabuka. Ya kele kieleka? Kuna ya ke vwanda dyaka ve. Ntangu yayi beno tala. Nyonso yina kuzwaka mbandukulu kele na nsuka, samu ti nyonso yina kuzwaka mbandukulu kele ngidikulu. Kasi Nzambi kuvangamaka ve, Yandi vwandaka ntangu nyonso Nzambi. Ya kele ve na kisika ti Yandi kuvangamaka. Mpe mutindu kaka ti beto lendaka kuzwa Luzingu ya Kukonda nsuka kele kuvwanda ndambu ya luvangu. Nkembo! Oh, kana beto lendaka mona Yawu! Beno me mona yina Mpeve-Santu ke salaka samu na beto? Ya kele Mpeve-

Santu, Yandi mosi Kiyidiki, Nzambi Tata na mutindu ya Mpeve, ya kubokila “Mpeve-Santu” samu ti Yawu vwandaka na zulu ya nzutu ba ke bokila Yesu, Mwana ya Yandi; ti Yandi vangaka Yesu, nzutu, ya kele samu na yina Yawu zolaka kufwa. Nzambi zingaka na nsuni ya muntu, mpe cellule ya menga zenganaka, mpe Luzingu ya cellule ya menga kwizaka.

¹²¹ Ya kele samu na yina ti musambidi na Ngwisani ya Ntama zolaka kwenda ve. . . yandi vwandaka kwenda na kitumbu mosi yina yandi kuzwaka ntangu yandi kwizaka. Kasi na Ngwisani ya Malu-malu, ke tuba Hébreux, ti, “Musambidi mbala mosi ya kuvedisa kele dyaka ve na konsiansi ya disumu.”

¹²² Ntangu yayi, na Ngwisani ya Ntama; ba zolaka nata mwana-dimeme, yandi vwandaka lalisa yawu, vwandaka tula maboko ya yandi na zulu ya yawu, musambidi; nganga-Nzambi vwandaka zenga laka, yandi vwanda kuwa kubasika menga, mpe vwanda kuwa kuboka ya yawu. Mpe ya vwanda kufwa, mpe yandi vwanda tala mwa nzutu ya yawu kukangama, mpe ya vwanaka ya kufwa. Yandi zabaka ti ya zolaka vwanda yandi; mwana-dimeme bakaka kisika ya yandi. Nganga-Nzambi vwanaka baka menga, vwanaka tula yawu na zulu ya autel mpe—mpe mulinga vwanaka mata, mpe ya vwanaka kisambu ya mulemu samu na ki- . . . [Kisika ya mpamba na bande—Mu.] . . . mpe luzingu yango ya kibulu zolaka vutuka ve na zulu ya muntu mpe kuvukana na mpeve ya muntu, samu ti ya kele mpeve ya kibulu. Luzingu ya kibulu mpe luzingu ya muntu, ya lenda simba ve. Kasi ntangu. . . Ya kele samu na yina yandi vwanaka basika na nsatu mosi ya disumu, kima mosi. Yandi ke kwiza me sala pité, mpe ke pesa munkayulu ya yandi, mpe ke basika na kima mosi na dibanza ya yandi. Ya kele kieleka.

¹²³ Kasi awa ntangu musambidi. . . Oh, Dibuundu ya Nzambi, beno kondwa yayi ve! Musambidi, kieleka mbala mosi me belama na Mwana ya Nzambi mpe na nzila ya lukwikilu me tula maboko ya yandi na zulu ya Yandi (Oh, la la!), me tala kuna na kizizi ya Yandi na mante na zulu ya kizizi ya Yandi, Menga na kubasikaka na kizizi ya Yandi, kutala bampasi ya “Nzambi ya Munu! Nzambi ya Munu! Samu na yinki Nge me bika Munu?” Oh, mpangi, ntangu beno ke mona wapi ntalu yina kufwaka samu na beno, mpe Nani Yawu vwandaka, Emmanuel, Nzambi na kufwaka na kisika ya beno.

¹²⁴ Kuna yinki ke salama? Kuna musambidi, ntangu cellule yango ya Menga kuzenganaka na Mwana ya Nzambi. . . Yinki salaka cellule yango ya menga?

¹²⁵ Nani beno kele? Beno kele mwa cellule yina katukaka na tata ya beno. Kento kele na menga ve. Kento ke basisaka kaka diki; kibumbulu, yandi fwana nata bana. Kasi menga ke katukaka na bakala, ya kele samu na yina mwana ke bakaka nkumbu ya tata. Mpe na yina, kasi, kento na kukwelanaka na bakala, ke bakaka

nkumbu ya yandi, samu na bana; yandi ke kuma kibumbulu samu na mwana yina yandi ke buta samu na bakala yina. Kasi mutindu mu ke tubaka: nsusu ya kento lenda buta ve diki, kasi kana yandi vwanda na ndeke ya bakala, ya ke buta bana ve.

¹²⁶ Ya kele, mu tubaka, ya kele samu na yina beto kele na mabuundu mingi ya ntama, ya madidi, ya misiku bubu yayi. Bawu me kuzwa dibanza yayi ya ba-Nicolaïte, bawu kele na kikunku ya mazanza ya meki ya kupola, mpe bawu ata mbala mosi ve ke buta samu ti bawu kele ve. . . Beno lendaka sala nyonso na bawu (kubokila bawu ba-bishop, badiakre, mpe nyonso yankaka), bawu ke kwikila ata mbala mosi ve na bidimbu ke landa mikwikidi, samu ti bawu me vwandaka ntete ve na Bakala ya makwela, Yesu Klisto. Kana beno me kuzwa kivumu ya Bakala ya makwela yina na ngolo ya Nzambi . . .

¹²⁷ Ntangu cellule yango ya Menga kuzenganaka kuna na Calvaire, mpe Luzingu yina vwandaka na kati kuna, Yehowa ya fyoti. . . Oh, ya fwana bula!

¹²⁸ Beno zaba, muntu nyonso ke na sosaka kidimbu. Mutindu yina ve? Muntu nyonso ke tuba, “Oh, talisa munu kidimbu.” Ba-Juif tubaka, “Talisa beto kidimbu.”

¹²⁹ Beno bika munu kupesa beno kidimbu. Nzambi pesaka beno kidimbu. Ba lombaka kidimbu. Israël lombaka kidimbu. Yandi tubaka na profete, “Mu ke pesa bawu kidimbu ya kukondwa nsuka: mwense ke kuma na kivumu. Mwense ke kuma na kivumu mpe ke buta Mwana.” (Amen.) “Yandi ke vwanda ya kubokila *Immanuel*, ‘Nzambi na beto.’” Kidimbu ya kulutila nene yina pesamaka ntete.

¹³⁰ Ntangu Nzambi, Kiyidiki ya mazulu mpe ntoto, kusalaka système solaire. Beno vwanda kuna na Mongo ya Palomar mpe beno tala na nzila ya télescope yina kuna, mpe beno lenda mona nkama mpe makumi zole ya mafuku ya bamvula ya ntangu ya nsemo. Beno balula yawu na bakilometlele, mpe na manima ya kele dyaka na ngonda, mpe bambwetete, mpe bayinsi, mpe Yandi salaka yawu nyonso. Yandi fulaka kaka yawu na maboko ya Yandi, mutindu *yina*. Yinga!

¹³¹ Mpe Kiyidiki yango ya nene kumaka Mvulusi ya munu. Yandi kwizaka na mwa cellule yango ya Menga, na nzila ya muntu ve, kasi me kwiza na mwense ya kento; mpe bakaka mwa pollen yayi na kento, mpe salaka Yandi mosi mwa yinzo mpe zingaka na kati ya yawu. Oh, ya—ya—ya fwana bula! Yehowa! Yehowa, na zulu ya kikunku ya matiti na kidikulu, ke na kudilaka. Yehowa, na kidikulu ya matiti. Ya kele kidimbu ya kukondwa nsuka, mwa bantu yayi ya nene yina zola kutalana! Yehowa, Nzambi, Bébé ke na kudilaka (Alleluia!) na kidikulu ya nsunga ya yimbi. Mpe kuna beto ke banza ti beto kele muntu, ke nangula mbombo ya beno na zulu; kana mvula noka, ya ke dyamisa beno; mpe kuna kulandila kukwenda na kubanzaka

ti beno kele muntu mosi. Mpe Yehowa ya kulala na kidikulu, na zulu ya matiti, ke na kudilaka mutindu mwana. . .mwana nyonso ya bébé. Ya fwana bula! Ya kele kidimbu. Nzambi tubaka, “Mu ke pesa beno kidimbu ya kukondwa nsuka.” Ya kele kidimbu ya kieleka. Yehowa, ke na kusakanaka mutindu mwana ya bakala. Yehowa! Yehowa, ke na kusalaka na lateliye, ke na zengaka bayinti mutindu kisadi-mabaya. Alleluia! Oh, oh, la la! Yehowa, ke na kusukulaka makulu ya bilobi. “Mu ke pesa beno kidimbu.”

¹³² “Oh, kasi beto fwana kuzwa bisyelo, beno zaba, na barobe mpe bakarte-col nyonso, bankingu, mpe. . .” Beno me mona? Oh!

¹³³ “Mu ke pesa beno kidimbu ya kukondwa nsuka.” Yehowa, ya kutelama na cour na mante na zulu ya kizizi ya Yandi. Yehowa, ya kotalana kinkonga, na nzutu, na kati-kati ya mazulu mpe ntoto. Yandi vwezaka nsoni ya kulunsi. Beto kele na kiteki ya Yandi kuna na mwa kitende ya kuzunga Yandi; kieleka ya kele kaka kisadi-biteki me sala yawu. Ba katulaka Yandi bilele nyonso, talisaka Yandi nsoni! Oh, nkonga yina ya bantu ya luvunu ntangu ngunga yina kwizaka! Yayi kele kilumbu ya muntu, kilumbu ya Mfumu ke na kwiza. Yehowa! Yehowa, na kufwaka, yinga, kima ve kusalamaka. Yehowa, na kusambilaka, kima ve kusalamaka. Hmm. Ya kele kieleka. Ya fwana bula! Ya kele kidimbu ya kukondwa nsuka. Ya kele kidimbu yina bantu nyonso zolaka zaba. Na manima Yandi kufwaka, Yehowa kufwaka. Kuna ntoto bandaka na kuningana. Oh, la la!

¹³⁴ Na manima Yandi vumbukaka na ntoni mpe mataka na Zulu. Yehowa, na kuvutukaka na mutindu ya Mpeve-Santu samu na kuzinga na Dibuundu ya Yandi, na kati ya bantu ya Yandi. Nkembero! Yehowa, na kutambulaka na nzila ya dibuundu, ke swasikisa mabanza ya dibanza. Yehowa, ke belusa bambevo. Yehowa, ke zonza na nzila ya bikoba tii muntu ke twadisa ve yandi mosi. Yehowa, ke vutuka na Kingelesi mpe ke bangula yawu. Beno zola kidimbu? Amen! Yehowa yango ke kulumuka na kento ya ndumba, ke telemisa yandi kisika yandi kele mingi—yandi kele mingi na yisi tii bayimbwa ke tala ve yandi, mpe ke sukula yandi mpembe mutindu mvula ya mpembe mpe ke pesa yandi ntima ya kuvedila mutindu lis. Oh, la la! Yehowa, ke baka kinwe-malafu yina kele ya kulala kuna na nzila mpe banzinzi ya kifuluka na yinwa ya yandi, mpe ke sala yandi kulonga Nsangu ya mbote. . .? . . .Menga ya Yesu Klisto ke vedisa beto!

¹³⁵ Ntangu Yandi vwandaka na ntoto, Yandi kwendaka na mbanza ya kulutula yina vwandaka, mpe na bantu ya kulutula yisi yina vwandaka, mpe ba pesaka Yandi nkumbu ya kulutula yisi yina vwandaka. Ya kele kieleka. Ba talaka Yandi mutindu ya kulutula yimbi, mpe bokilaka Yandi na nkumbu ya kulutula yimbi yina zolaka vwanda ba bokila, “Belzébül,” dyabulu. Ya kulutula yisi ba lendaka kupesa Yandi, bantu pesaka Yandi.

136 Kasi Nzambi telemisaka Yandi, mpe Yandi pesaka Yandi Kiti ya kimfumu ya zulu mingi tii Yandi zolaka tala na yisi na kumona Mazulu. Amen! Nkembo! Mpe pesaka Yandi Nkumbu na zulu ya konso nkumbu yina kele ya kutuba na Mazulu mpe na ntoto, mpe dibuta nyonso na Mazulu mpe na ntoto kele na nkumbu ya Yandi. Ya kele yina muntu banzaka na Yandi; ya kele yina Nzambi banzaka na Yandi. O Nzambi, bika mabanza ya munu kuvwanda mutindu ya Nge, Tata. Yinga, tata. O Nkumbu ya ntalu!

137 Ntangu yayi, “Yandi yina ke kwikila na Munu kele na Luzingu ya Kukonda nsuka.” Ntangu yayi, kana ya kele na mutindu kaka mosi ya Luzingu ya Kukonda nsuka, mpe ti beno kuzwa yawu mpe beto ke na kusosaka yawu na nzila ya Yesu Klisto, ya kele Luzingu ya Nzambi. Kuna ntangu cellule yango ya Menga kuzenganaka na Mwana ya Nzambi, mpe mwa Yehowa yango yina vwandaka ya kukangama na kati ya Muntu yayi ya kubokila Yesu (ntangu na kati ya Yandi vwandaka zinga muvimba ya Bunzambi na nzutu), mpe ntangu beto ke ndima Menga *yango* samu na lemvo ya masumu ya beto, Mpeve yango yina vwandaka na zulu ya muntu ve, kasi na zulu ya Nzambi . . . Nkembo! Biblia ke tuba, “Menga ya Nzambi.”

138 Muntu tubaka, “Bambuka moyo, Yandi . . . Kutuba ve kima na yina me tala ba-Juif, samu ti Yandi vwandaka Juif.” Yandi vwandaka ve Juif. Yandi vwandaka ve Juif to dyaka Muntu ya makanda, Yandi vwandaka Nzambi. Ya kele kieleka. Yandi vwandaka Menga ya kuvanga. Nzambi salaka Yawu mutindu yankaka. Ya vwandaka ya Yandi Mosi, mpe na nzila ya Menga yina vangamaka beto ndimaka Yawu mutindu lemvo ya beto samu Yandi kufwaka lufwa samu na beto. Cellule ya Menga yango yina zenganaka, bikaka Mpeve-Santu kuvutuka na beto, mpe ntangu yayi beto kele bana ya babakala mpe bana ya bakento ya Nzambi na nzila ya mbutukulu ya Mpeve. Na yina Luzingu yina vwandaka ya Nzambi, yina kuzwaka ve mbandukulu to dyaka ya ke kuzwa ve nsuka, kele ya munu mpe ya beno na lemvo ya Nzambi na Yesu Klisto. Beno bawu yayi.

139 Ntangu yayi, “difelo,” beto ke vutuka na yina na ntangu fyoti. Mu me tuba na beto ti—ti ya lenda vwanda ve . . . Mu ke kwikilaka na difelo ke kuyokama na tiya. Yinga, tata, Biblia ke tuba yawu, dyanga ya tiya. Ntangu yayi, kasi ya lendaka vwanda ve ya kukondwa nsu- . . . ya lenda vwanda ve Seko. Ya lendaka vwanda . . . Biblia ke tuba ata mbala mosi ve ti ya kele Seko, Yawu ke tuba difelo “ya kukondwa nsuka”. Yawu ke tuba ve mpova Seko, ya ke tuba difelo “ya kukondwa nsuka”. Ntangu yayi, ya kele ya kukubika samu na dyabulu mpe bawanzio ya yandi; difelo ya kukondwa nsuka, ve mosi ya Seko. Ntangu yayi, na manima . . . Moyo yina lendaka vwanda ya kukwamisa kuna samu na bisalu ya yawu kumi ya mafuku ya bamvula, landila nyonso yina mu zaba. Mu zaba ve yinki *kukondwa nsuka* lendaka vwanda na meso ya Nzambi. Ya lendaka vwanda baminuti tanu,

ya lendaka vwanda fuku ya bamvula, ya lendaka vwanda kumi ya mafuku ya bamvula, kasi ya ke kwiza kilumbu ntangu moyo yina ke suka na kuzinga.

140 Beno tala yina Biblia ke tuba, beno me mona:

. . . Yandi yina ke nunga ke tala ve mpasi na nzila ya lufwa ya zole.

141 Lufwa ya ntete ke kabisaka beto na bantu ya beto ya luzolo. Beto ke kwenda na Mvwandulu ya Nzambi, ata mbala mosi ve na ngaanda ya Mvwandulu ya Yandi. Beno me mona? Ntangu yayi, kana ya kele na lufwa ya zole, kuna ya fwana vwanda lufwa ya moyo. Mpe kuna yandi yina ke nunga yinza, to ke nunga bima ya yinza, kele na Luzingu ya Kukonda nsuka mpe ke simbama ve na lufwa ya zole. Beno bawu yayi, Luzingu ya Kukonda nsuka. Kasi musumuki . . . Biblia ke tuba, “Kento yina ke zinga na kati ya kyese kele ya kufwa na yina yandi kele moyo.” Ya kele kieleka? “Moyo yina ke sumuka, kieleka yawu ke kufwa.” Yinki kele *lufwa*? Na muvimba ke “kabisa,” “kima dyaka ve.” Beno me mona? Ntangu yayi, ba me katula yawu, ya kele kieleka. Ba me katula yawu, ya kele dyaka ve na kima na yawu. Bilumbu yikwa ya ke vwanda na kubaka yawu? Ya ke kulumuka na nzila mosi ya kwizaka, mpe ya ke kuma na kisika tii ya ke vwanda dyaka ve na kima ke bikana na yawu. Ya ke vutuka kaka na yina ba salaka yawu.

142 Beto lendaka baka cellule, mpe kuzenga cellule na cellule mosi, na cellule yankaka, tii beno ke kuma na cellule ya ntete; kuzenga cellule yina, na manima beno ke kuzwa bima ya chimie ya menga; beno ke kota na bima mingi ya chimie ya menga, mpe kuna beno ke kuma na mwa kitini mosi ya cellule yango: ya kele luzingu. Ba lenda tala yawu ve. Ba zaba kima mosi ve na zulu ya yawu. Ntangu yayi, luzingu yango na nsuka ke kuma na kisika tii ya kele dyaka ve; ata bima ya chimie ya luzingu yina, mu ke kwikila ve ti ya kele na kima mosi ya chimie. Ya ke vwanda kimpeve.

143 Mpe kuna, na yina, na nsuka ya ke kabuka ya muvimba mpe ke vwanda dyaka ve. Ya kele yina Biblia ke tuba, “Moyo yina ke sumuka, ya ke kufwa.” “Mpe bawu yina ke nunga na bansungi ya dibuundu yayi awa ke tala ve mpasi ya lufwa ya *zole*.” Nzutu ke kufwaka ntete, moyo ke kufwaka na manima mpe ya ke vwanda dyaka ve. Beno me mona? Ya kele . . . beno ke kwikila ya kele Biblia ti ke tuba yawu?

144 Ntangu yayi beno bambuka moyo, kana difelo kele Seko, kuna Biblia kele luvunu ntangu ya ke tuba “difelo kuvangamaka.” Mpe kuna kana muntu ke zika na tiya ya Seko, na difelo, kuna yandi fwana vwanda na Luzingu ya Kukonda nsuka na kuvwanda ya kuzaba, ya kuzika na tiya. Ya kele kieleka? Mbote, mitindu yikwa ya Luzingu ya Kukonda

nsuka kele kuna? Mosi. Ya kele kieleka. Kaka Luzingu mosi ya Kukonda nsuka.

145 Ntangu yayi, beno kwenda ve mpe kutuba, “Mpangi Branham ke kwikilaka ve na difelo.” Mpangi Branham ke kwikilaka na difelo. Biblia ke longa ya kele na difelo. Kaka mutindu kieleka ya kele na kisika ya kupema, ya kele na kisika ya—ya kitumbu. Mpe Nzambi kieleka ke sala moyo yina ke sala disumu na ntwala ya Yandi kuzwa kitumbu. Mpe na kumangaka Yesu Klisto mutindu Mvulusi ya beno, kieleka beno ke kuzwa kitumbu samu na yawu. Kasi ya ke vwanda na kilumbu ntangu beno ke vwanda dyaka ve. Kasi bamvula mafuku yikwa ya ke baka beno na kuvutuka na yawu, mu zaba ve. Kasi ntangu yankaka. . .

146 Beno kele moyo ya ntangu tii beno ke butama dyaka, kuna beno kele moyo ya Seko. Mpe mutindu kaka beno lenda kuzwa Yawu kele kuzwa ndambu ya Nzambi na kati ya beno, na kuvwandaka Luzingu ya Kukonda nsuka. Beno lenda mona yawu? Kieleka.

Yandi yina kele na dikutu, ti yandi kuwa yina Mpeve ke tuba na mabuundu; . . .

147 Mu zola Yandi. Beno ve? Mu kele na nsayi mingi ya kuvwanda na Luzingu ya Kukonda nsuka. Ya ke kwamisa munu dyaka ve, samu ti beto kele na Luzingu ya Kukonda nsuka ntangu yayi. Mpe mu zaba yawu, mpe mu ke sala kivuvu ti muntu nyonso ke kuzwa Yawu, beto nyonso.

148 Irénée, yinga, mu vwandaka na note awa na zulu ya Irénée, na, “samu na kutanga disolo yayi.” Ti ya kele samu na yina Irénée kusoolamaka kele samu ti yandi vwandaka na bidimbu ya Dibuundu ya Pantekote (ya ntete) yina vwandaka landa yandi.

149 Ntangu yayi, kana Nzambi. . . Bantu yikwa ke kwikila ti Dibuundu ke banda na Pantekote? Mbote mingi. Bantu yikwa ke kwikila ti Nzambi ndimaka Dibuundu ya Pantekote? Mbote mingi, tata. Na yina kana ya vwandaka Dibuundu ya ntete ya Nzambi, mpe ti ya kele yina Yandi ke bokila “Dibuundu,” mpe Yandi kele Vinu ntangu yayi, beto kele bintala, kana Vinu ke buta kintala yankaka, yinki ya ke vwanda? Ya Pantekote. Yinga! Ntangu yayi, ya lendaka vwanda ve na nkumbu. Ntangu yayi beto kele na *bankumbu* ya Pantekote, kasi ya kele ve ya kulutula na Méthodiste, Baptiste, Presbytérien, Pantekote. Ya zola tuba kima ve, beno me mona, ya kele kaka nkumbu. Kasi ntangu nyonso yina beno kele na Nzingulu ya Pantekote na kati ya ntima ya beno, Pantekote na kati ya mwela ya beno, na kupesaka beno Luzingu ya Kukonda nsuka, na yina Nzambi silaka beno yawu, “Beno ke simbama ve na lufwa ya zole;” ti, beno kele na Luzingu ya Kukonda nsuka mpe *lenda ve* kuvwanda ya kusimba na lufwa ya zole. Beno me mona? Beno me kuzwa. . . beno kele. . .

150 “Beno nyongisa ve Mpeve-Santu ya Nzambi.” Ntangu yayi, beno nyongisa Yawu ve (kusala ve bima yina kele yimbi). Kana beno sala, beno ke futa yawu; samu Biblia ke tuba, “Beno nyongisa ve Mpeve-Santu ya Nzambi na yina ba me tula beno kidimbu tii kilumbu ya beno ya mpulusu.” Ya kele kieleka? “Beno nyongisa ve Mpeve-Santu.”

151 Oh! Ya ke vwanda kilumbu mosi ya mbote, suka mosi, mosi ya bilumnbu yayi. Samu na kutalisa beno ti mvumbukulu ke vwanda na yinza ya muvimba, “Ya ke vwanda na zole na bilanga, mpe Mu ke baka mosi; mpe zole na mbeto, mpe Mu ke baka mosi.” Beno me mona, ya ke vwanda na mpimpa kisika mosi, mpe nsemo ya kilumbu na lweka yankaka ya ntoto; ya ke vwanda mvumbukulu ya yinza nyonso, Enlevement yango. Mpungi ya Nzambi ke wakana, mpe mosi na mosi ya bayayi, ya dibuundu ya fyoti yayi *awa, awa, awa*, mpe mwa konga yina me lutila *kuna*, mpe me kwiza *awa, awa, awa*.

152 Ntangu mwense yina, mwense yina ntangu yandi monaka na ngunga ya sambwadi ya mpimpa ti. . . Ntangu yayi, beno bambuka moyo, ya vwandaka na bamwense sambwadi. Ya kele kieleka? To, mu zola kuzonza bamwense tanu kubasikaka. . . Bamwense kumi kubasikaka na kukutana Mfumu, tanu vwandaka ya mayela mpe tanu vwandaka bizoba. Ya kele kieleka? Mpe ntangu yayi, na yina me tala bangunga ya mpimpa, ya vwandaka na bangunga sambwadi ya mpimpa. Mpe na nsuka ya ngunga ya mpimpa ya sambwadi (bayankaka lalaka na ngunga ya mpimpa *yayi*, ya yandi *yayi*, ya yandi *yayi*, ya yandi *yayi*, mpe *yina*, . . .), na ngunga ya sambwadi ya mpimpa, ya vwandaka na ndinga tubaka, “Beno tala, Bakala ya makwela ke na kwizaka, beno basika na kukutana Yandi.” Mpe bawu telamaka mpe kubikaka minda ya bawu. Mpe nyonso yayi yankaka kutelamaka *awa*. Oh, ya ke vwanda ve ntangu ya mbote!

Oh, beto vwanda yimbaka mwa nkunga mosi:

Ya kele ntangu ya mbote samu na nge,
Wapi mutindu ya ntangu ya kulutila mbote
samu na munu;
Kana beto nyonso kuyilama samu na kukutana
Yesu Ntinu ya beto,
Wapi ntangu ya mbote ya ke vwanda.

Awa, beto mona kana beto lenda yimba yawu:

Ntangu ya mbote samu na nge,
Ntangu ya mbote samu na munu;
Kana beto nyonso kuyilama samu na kukutana
Yesu Ntinu ya beto,
Wapi ntangu ya mbote ya ke vwanda. (Ya ke
vwanda ve mbote?)

Oh, ya ke vwanda ve mbote kuna,
 Na kuvwandaka dyaka ve bizitu ya kunata?
 Na kuyimba ya kyese na bangunga nyonso ya
 ntima kusala makelele,
 Oh, ya ke vwanda mbote ve kuna?

153 Beno yikwa zaba ti beno ke kuma na yinzo? Bantu yikwa zaba ti beno ke basika na mwelo yina? Beno zaba ve. Bantu yikwa zaba kana beno basika beno ke kota dyaka? Beno lenda tuba ve. Na yawu beno kondwa ve nkokila yayi; beno kondwa ve Nzambi na nkokila yayi, samu ti yayi lendaka vwanda nkokila ya nsuka yina beno ke kuzwa ntangu to siansi. Nani beno kele, na mutindu nyonso? Wapi kisika beno me katuka? Wapi kisika beno me katuka? Buku kaka na yinza yina lenda tubila beno yinki ya kele, kele Biblia ya kusakumuna ya ntama yayi awa. Mpe ya kele na Biblia yina beto ke kwikila, ya kele na Nzambi yina beto ke kwikila.

154 Mpe kana beno kele ve na kati ya Kento yango ya makwela, na kati ya mwa nkonga yayi ya bantu ndambu, yina na yisi *awa* bubu yayi kele ya kukangisa na ba-credo mpe ba-dénomination, mpe nyonso yina, kana—kana—kana beno kele ve na mwa nkonga yina. . . Ntangu yayi, beno kele ve na nsatu ya kukuma ya tabernacle yayi, beno kele ve na nsatu ya kukuma ya kima mosi, beno fwana butama kaka na Kimfumu yango. Ntangu yayi, kana beno ke zola kubundana na ba-Méthodiste, ba-Baptiste, ba-Presbytérien, kisika nyonso beno ke zola, yina me tala beno. Beno me mona, beno sala kubundana ya beno na muntu nyonso beno zola. Kasi mu ke tuba na beno kima mosi: ntangu beno ke butuka dyaka, “bandeke ya mapapu. . .” Oh!

155 Muntu mosi yufulaka munu kilumbu mosi, na kutubaka, “Mpangi Branham, nge me tuba na bantu yina, ‘Beno vutuka na dibuundu ya ba-Méthodiste.’”

Mu tubaka, “Kieleka. Ti ba losa bawu na ngaanda, mpe bawu kele ve na kisika ya kukwenda.” Na yina kuna beto ke mona. . .

Ya kele nyonso mbote, bawu ke vutuka manima, ya ke vwanda ve ntama mingi, beno me mona. Ya ke vwanda ve ntama mingi, bawu ke vutuka dyaka.

156 Beno zaba, kilumbu mosi na. . . Noé. . . nzasa, kisika ya kiswamunu, Noé, ya vwandaka na kufuluka ya maza ya nene vwandaka kwiza. Mpe na yawu Noé basisaka ngoyi-ngoyi na nzasa, mpe yandi kwendaka kaka na kubokaka mpe na kotalaka bisika nyonso. Mbote, yandi sepelaka, samu ti yandi vwandaka voutour na kubanda. Yandi lendaka pumbuka na mvumbi mosi ya kufwa, mpe kudya na kufulusaka kivumu ya mule yayi, mpe kukwenda kuna na dimeme yayi—yayi ya ntama mpe kudya na kufulusaka kivumu ya yandi, mpe kima yankaka, kisika ya vwandaka kaka na mutindu nyonso ya bamvumbi ya kufwa ya kulala bisika nyonso.

157 Na yawu ngoyi-ngoyi ke vwanda kaka na yisi kuna mpe ke boka kuna, “Bakala, mu ke na kuzwaka jubiléé nyonso munu mosi!” na kusalaka kaka makelele.

158 Kasi ntangu ba basisaka mwa yembe yayi, yandi vwandaka na nkadulu ya mutindu yankaka. Nsunga yina, yandi “vwanda lenda yawu ve. Hmm!” Samu na yinki? Yembe kele na ata kima ya ndudi ve; yandi kele kaka ndeke yina kele ve na kima mosi ya ndudi. Yandi ke lenda ve kudya yawu, na yawu kima mosi kaka yandi lenda sala kele kuvutuka kaka na nzasa mpe kukonkota na mwelo.

159 Beno kwenda kaka kisika nyonso beno zola. Kima mosi kaka mu lenda lomba beno na kusala kele kaka kukwiza na Kimfumu, mpe mu ke zaba kisika beno ke kwenda. Beno ke lenda dyaka yawu ve, mpangi, beno ke tuba, “Mu me sabuka ndilu ya kukabuka, mu me bika na manima yinza yayi.” Yinga, tata. Kieleka ya kele.

Oh, ba vwandaka ya kuvukana na kivinga ya zulu,
 Bawu nyonso vwandaka sambila na Nkumbu ya Yandi,
 Bawu vwandaka ya kubotama na Mpeve-Santu,
 Mpe ngolo ya kisalu kwizaka;
 Ntangu yayi yina Yandi salaka samu na bawu kilumbu yina
 Yandi ke sala samu na beno mutindu mosi,
 Mu kele na kyese mingi ti mu lenda tuba mu kele mosi ya bawu. (Beno ve?)

Mosi ya bawu, mu kele mosi ya bawu,
 Mu kele na kyese mingi ti mu lenda tuba . . .
 mosi ya bawu; (Alleluia!)
 Mosi ya bawu, mu kele mosi ya bawu,
 Mu kele na kyese mingi ti mu lenda tuba mu kele mosi ya bawu.

Bantu yikwa kele na kyese samu na yawu na nkokila yayi?
 Oh, la la!

Beno kwiza, mpangi ya munu, kusosa lusakumunu yayi
 Yina ke vedisa ntima ya nge na disumu,
 Yina ke sala ngunga ya kyese kubula
 Mpe ke bumba moyo ya beno na tiya;
 Oh, ya ke na kupela ntangu yayi na kati ya ntima ya munu,
 Oh, nkembo na Nkumbu ya Yandi,
 Mu kele na kyese mingi ti mu lenda tuba . . .
 mosi ya bawu.

Mu kele mosi ya bawu, mu kele mosi ya bawu,
 Mu kele na kyese ti mu lenda tuba . . . mosi ya
 bawu; (Alleluia!)
 Mosi ya bawu, mu kele mosi ya bawu,
 Mu kele na kyese mingi ti mu lenda tuba mu
 kele mosi ya bawu.

¹⁶⁰ Ntangu yayi na yina beto ke yimba nzila yankaka yayi, mu zola beno kupesana mbote, mutindu beno ke salaka konso nkokila, ba-Méthodiste, mpe ba-Baptiste, mpe ba-Presbytérien nyonso. Beno pesana maboko mosi na yankaka, mpe kuvwanda na mutindu ya kimpangi mingi ti beno ke tafuna mosi na yankaka chewing gum, kana beno lenda. Ntangu yayi beno vwanda kaka kieleka, bampangi ya kieleka, kuvwanda muntu ya mbote ntangu yayi na yina beto ke yimba yawu:

Mu kele mosi ya bawu, mosi ya bawu,
 Mu kele na kyese mingi ti mu lenda tuba mu
 kele mosi ya bawu;
 Mosi ya bawu, mosi ya bawu,
 Mu kele na kyese mingi ti mu lenda tuba mu
 kele mosi ya bawu.

Ata ti bantu yayi longokaka ve,
 To kuzabana ya yinza ya lunangu,
 Bawu nyonso me kuzwa Pantekote ya bawu,
 Kubotamaka na Nkumbu ya Yesu;
 Mpe bawu ke na kutubaka ntangu yayi, bisika
 nyonso,
 Ngolo ya Yandi kele dyaka mosi,
 Mu kele na kyese mingi ti mu lenda tuba . . .

Ntangu yayi beto yimba kieleka yawu:

Oh, mosi ya bawu, mosi ya bawu,
 Mu kele na kyese mingi ti mu lenda tuba . . .
 mosi ya bawu; (Alleluia!)
 Mosi ya bawu, mosi ya bawu,
 Mu kele na kyese mingi ti mu lenda tuba mu
 kele mosi ya bawu.

¹⁶¹ Beno ke zola kuvwanda mbangi ya Smyrne samu na Yandi? Kana ya kuma na kisika ti beno fwana kukutana lufwa to kuvutuka, beno ke kutana yawu? Yinga, tata. O Nzambi, ya ke vwanda kyese. Yinga, tata. Ya kele mutindu mu zola kukwenda, kaka na chaire. Ya kele kieleka. Mu banzaka ti ya sukaka samu na munu mpe bawu zolaka sala yawu na Allemagne awa ntama mingi ve. Oh, ba zolaka kubula munu na kusadilaka mineti ya mpimpa, mpe basoda nyonso ya Allemagne kwizaka zunga munu mpe simbaka munu mutindu *yina*. Mu banzaka, “Wapi kima ya mbote ya zolaka vwanda na kufwa samu na Mfumu kaka awa na bilanga ya kumwangisa nsangu.” Oh, la la! Wapi—wapi kima ya mbote.

¹⁶² Mbote, beno bika munu kuyimbila beno mwa nkunga. Mu lenda? Beno kele—beno kele na ntangu samu na mwa mosi kaka fyoti? Mbote mingi. Mu lenda ve kuyimba yawu, mu ke zonza yawu. Oh, mu ntangu nyonso ke zolaka kuyimba. Mpe mosi ya bilumbu yayi ntangu beno ke kuma na yinzo ya beno ya nene ya luzolo kuna na zulu na Paladiso, ntama mingi na nsuka ya bayinti kuna, kisika Russell Creech mpe munu ke vwanda na kuzomba yayi, beno zaba. Ntama mingi na nsuka ya bayinti ya kele na mwa cabine na lweka kuna yina Mpangi Neville ke yimbaka, *Tungisa Munu Cabine na Nsongi*, (Mu banzaka ti yandi vwandaka zonzila na kisika ya munu.) na *Yinsi ya nkembo*. Mosi ya basuka yayi ntangu beno ke kuma na mwelo ya beno ya nene kuna, mpe beno tala na kizunga mutindu yina, ntama mingi kuna na nsongi beno ke kuwa muntu kuyimba:

Lemvo ya ngitukulu! Wapi mutindu mbote ya
ke wakana,
Yina me vulusa muntu ya mawa mutindu
munu!

¹⁶³ Beno ke tuba, “Mbote, lusakumunu na Nzambi, kiboba ya Mpangi Branham me lenda. Yandi yina, mu ke na kuwa yandi ya kutelama kuna ntangu kaka yayi, ke na kuyimbaka *Lemvo Ya Ngitukulu*.”

¹⁶⁴ Ya kele lemvo ya ngitukulu yina me nata munu kuna. Ya kele kieleka.

Kasi ya ke na kubasisa menga, yinga, (Ya kele
samu na yina mu ke na kulongaka Yayi.) ya
ke na kubasisaka menga,
Nsangu ya mbote ya Mpeve-Santu yayi ke na
kubasisaka menga,
Menga ya bilandi yina kufwaka samu na
Kieleka,
Nsangu ya mbote ya Mpeve-Santu yayi ke na
kulantila na kubasisa menga.

Muntu ya ntete yina kufwaka samu na dyambu
ya Mpeve-Santu yayi,
Vwandaka Jean Mubotiki, kasi yandi kufwaka
mutindu muntu;
Na manima kwizaka Mfumu Yesu, ba komaka
Yandi na kulunsi,
Yandi tubaka ti Mpeve zolaka vuukisa bantu
na disumu.

Ya vwandaka na Pierre mpe Paul, mpe Jean ya
ntumwa,
Ba pesaka baluzingu ya bawu samu Nsangu ya
mbote yayi lezima;

Ba vukisaka menga ya bawu, mutindu
baprofete ya ntama,
Samu Ndinga ya kieleka ya Nzambi kupesama
na kusungama.

Ya kele na moyo na yisi ya autel, (bambangi
yayi,) ke na bokaka, “Bilumbu yikwa?”
Samu na Mfumu na kusemba bayina salaka
yimbi; (Beno kuwa! Na nswalu!)
Kasi ya kele na mingi yina ke pesa menga ya
luzingu ya bawu
Samu Nsangu ya mbote ya Mpeve-Santu yayi
mpe kubasika ya Yawu ya mbwaki.

Ya ke na kubasisaka menga, yinga, ya ke na
kubasisaka menga,
Nsangu ya mbote ya Mpeve-Santu yayi ke na
kubasisa menga,
Menga ya bilandi yina kufwaka samu na
Kieleka,
Nsangu ya mbote ya Mpeve-Santu yayi ke na
kulandila na kubasisa menga.

165 Oh, ya ke vwanda . . .

[Mpangi mosi ya kento ke na kuzonzaka na ndinga yankaka,
mpangi mosi ya bakala ke na kupesaka ntendulu. Mpangi mosi
ya bakala ke na kuzonzaka na ndinga yankaka, mpangi mosi ya
kento ke na kuzonzaka na ndinga yankaka. Kisika ya mpamba
ya bande. Mpangi mosi ya bakala ke na kupesaka ntendulu—Mu.]
Nkembo. Amen. Amen. Hmm. Hmm. Nkembo. Amen. Yinga.

166 Amen. “Yandi yina kele na dikutu, ti yandi kuwa yina Mpeve
me tuba na mabuundu.”

Mu zola Yandi . . .

Beno sambila ntangu yayi, beno me mona yina Yandi ke sala.
Kana beno me zolaka ntete Yandi ve, beno ke zola kuzola Yandi
ntangu yayi? Beno ke zola kutelama mpe kuzaba Yandi, kubaka
Yandi mutindu Mvulusi ya beno?

. . . munu, (Nzambi sakumuna nge, mpangi ya
bakala.)
Mpe futaka . . .

Muntu yankaka ke telama, ke tuba, “Mu zola Yandi, kaka
ntangu yayi, mu zola kuzola Yandi”?

. . . Mpulusu
Na Calvaire . . .

Nzambi sakumuna nge, mpangi ya kento. Nzambi sakumuna
nge kuna na manima, ntwenya ya mama.

Mu zola Yandi . . .

Yandi yina kele na dikutu, ti yandi kuwa yina Mpeve me tuba na dibuundu.

. . . Yandi zolaka munu ntete
Mpe futaka mpulusu ya munu
Na yinti ya Calvaire.

167 Tata ya beto ya Mazulu, mutindu Nge me mona bantu tatu yayi kutelama, O Nzambi, mu ke sambila Nge na kutala kyadi, O Muntu ya Seko, mpe kupesa na bawu lemvo ya konso disumu, mpe mpulusu, Mpeve-Santu na luzingu ya bawu, ti bawu ke simbama ve na lufwa ya zole. Bawu me bakula, Mfumu, na nkokila yayi, na yina bawu me telama kuna, ti—ti ya kele na kima mosi ke na kubelamaka. Mpeve-Santu me pesa malongi. Kumona Mpeve ya Nzambi kubwa na kati-kati ya bantu, kumona Yawu kusala landila kaka Masonuku, kaka bansangu tatu mpe yimeni. O Nzambi, nsangu na konso muntu.

168 Ntangu yayi, Tata, beto ke sambila Nge na kuvwada na kyadi. Ti Mpeve yango ya ntalu kuvwanda na kati ya beto. Ti beto zitisa Yawu, Nzambi; pesa yawu. Baka moyo yayi na nkengololo ya Nge, Tata, ba kele bambuma ya Nsangu na nkokila yayi, mpe ya nsangu ya Mpeve-Santu yina vwandaka me zonzama na kati-kati ya beto. Mpe beto ke lomba, Tata Nzambi, ti Nge ke vwanda na bawu bilumbu nyonso ya luzingu ya bawu. Mpe ti “na yinza ya kukondwa nsuka” ti beto kutana bawu kuna, ya kuvuuka na Menga mpe lemvo ya Klisto. Beto ke pesa bawu na Nge ntangu yayi, Tata, fulusa bawu na Mpeve-Santu ya Nge. Samu beto me lomba yawu na Nkumbu ya Yesu. Amen.

169 Nzambi sakumuna beno, bankundi. Muntu nyonso kele pene-pene ya bantu yango yina vwandaka ya kutelama, Miklisto, beno pesa bawu mbote na yina bawu ke na kuvwandaka, pesa bawu. . . beno tuba na bawu beno zola bawu kukwenda na ntwala na Nzambi.

170 Beno me mona mutindu Mpeve-Santu kele na buzitu, mutindu Yawu ke sala yawu na nsuka? Beno me mona? Biblia ke tuba, “Ti. . . bawu yina ke zonza na bandinga kuvwanda zole, to ve. . . ya milongi tatu,” beno me mona. Nsangu ve na yina mu vwandaka longa, na manima yawu me manisa. Ya kele mutindu ya fwana vwanda, muntu nyonso na buzitu nyonso mpe ke kuwa yina Mpeve ke tuba. Na manima yinki me salama? Misumuki me telama samu na kubalula ntima. Oh, beno banza na yawu. Mpeve-Santu Yawu mosi, kukondwa ya sala. . . mpe me vukana na Ndinga, me kwiza mpe me monisama.

171 Mu zaba bayankaka ya bantu yayi yina me zonza na bandinga, mu zaba bawu nyonso tatu yina me zonza; mpe mu—mu zaba bayina vwandaka me pesa bantendulu; mu zaba luzingu ya bawu kele ve na disumu na ntwala ya Nzambi. Mpangi Neville awa, pasteur ya beto, mulongi ya Méthodiste; ya kele mulongi ya Méthodiste, ya kuvwanda awa, yandi kuzwaka Mpeve-Santu.

Junie, awa, Mpangi Jackson, mulongi yankaka ya Méthodiste, kuzwaka Mpeve-Santu. Ya kele kieleka, na dikabu ya bandinga mpe bantendulu.

¹⁷² Mpe beno me tala mutindu mutindu beto kele na dibuundu, muntu nyonso na buzitu; Nzambi ke na kuzonzaka. Beno me mona mutindu Yandi me zonga kaka kieleka landila Biblia; mosi; nsangu me bakama kaka mbote ve, Yandi ke zonga dyaka yawu, kasi Yandi ke zonga ve kulutila bambala tatu; beno me mona, landila Masonuku kuna. Beno me mona, Yandi ke pesa nsangu yango; Ata mbala mosi ve ti Yandi salaka muvusu, “samu ti mpeve ya bapofete ke tumamaka na profete.” Nyonso ke kuwa mpe swi . . .

¹⁷³ Ntangu yayi ya kele mutindu dibuundu zolaka vwanda ya kusungama. Ntangu yayi samu na beno bantu yina lendaka vwandaka awa yina kele ya ngaanda, yina me kuwa munu kuzonga yawu, ya kele mutindu ya zolaka vwanda. Beno me mona, nsangu me basika. Beno me mona bandandu? Ya ke salama kaka *kuna*. Kima ke baka kisika, kaka kieleka mutindu kumona mabanza to mutindu nyonso ya mpeve yankaka. Yandi kele mbote ve? Oh, mu kele na kyese mingi na kuzaba ti kima mosi yina Santu Paul sungikaka, kele kaka *awa*, me kuyfwa ve kaka *awa*. Ya kele dyaka kima mosi. Oh, mu kele na kyese mingi mu lenda tuba mu kele mosi ya bawu. Beno ve? Mbote mingi.

¹⁷⁴ Ntangu yayi, mbasi na nkokila na ngunga ya sambwadi, beto ke baka nsungi ya Laodicée, mpe ya kele nsungi ya *makwela*. Mu ke zola beno kukwiza kana beno lenda. Mu vwandaka kaka fyoti lutale na nkokila yayi, ya lendaka vwanda samu Mpeve-Santu me zonga mpe nyonso. Kasi ya kele dyaka na ntangu, ya kele kaka pene ya baminuti makumi zole na manima ya ngunga ya yivwa. Mpe bantangu mingi mu kele awa tii ngunga ya kumi to ngunga ya kumi na mosi, na yawu ya kele kieleka ntangu ya mbote awa. Na yawu beno me sepela na bansangu ya Mfumu? Kieleka? Ya ke na kudikisaka moyo ya beno.

¹⁷⁵ Nzambi sakumunu beno, bana ya munu. Beno zaba, mu zola beno na ntima ya munu nyonso. Mpe bantangu yankaka ntangu Mpeve ke bakaka munu, ya ke zengaka zole . . . Ya kele mutindu Ndinga kele, Yawu kele na meno mutindu mbele ya meno zole. Yawu ke zenga na kukwiza, na kukwenda, na kati, na ngaanda, nzila nyonso. Kasi ya kele yina ke zengaka beto. Nzengolo ke zengaka kaka nsuni ya kulutila, bima yina beto zolaka kuzwa ve.

¹⁷⁶ Ntangu yayi, mu zola beno kutala. Beno me kuwa Mpeve na kutendula na nkokila yayi? “Beni bika bulawu yina!” Ya ke zengaka. Beno vwanda ya kieleka! Beto nyonso ke katukaka nzila, kasi Nzambi zaba kukumisa nkufi buzitu ya beto. Yandi ve? Kieleka Yandi ke salaka. Mu ke vutula matondo samu na yawu. Beno ve?

177 Nge kele mwa pianiste yango awa? Mu ke mona ve . . . Ya kele Teddy . . . ? Mu ke mona yandi ve awa kisika mosi. Yayi kele . . . ? Mbote mingi, mpangi ya kento, kana nge lenda. Ya kele mwana ya nge ya kento, Mpangi Daulton? Bokila ya kento. Mbote mingi. Mwa mama mosi ya mbote mingi, mu kele na kyese mingi ti nge kele Muklisto. Mbote mingi, yinki kele nkunga ya beto ya ntama, ya mbote ya kubasika? Beto meka mosi, kaka ntete beto basika, ntangu yayi. Kaka minuti, mpangi ya kento, ntete beto yimba *Baka Nkumbu Ya Yesu Na Nge*.

178 Bantu yikwa zaba *Beno Zimbana Ve Kisambu Na Dibuta?* Bantu yikwa ke sambilaka na dibuta ya beto, kisambu ya beno ya dibuta? Oh, ya kele mbote. Beto meka yawu mbala mosi, kaka mutindu na bantangu ya ntama ntangu yayi:

Beno zimbana ve kisambu na dibuta,
Yesu ke zola kukutana na beno kuna;
Yandi ke katula mawa ya beno nionso,
Oh, beno zimbana ve bisambu na dibuta.

Beno zola yawu? Beto meka dyaka yawu:

Beno zimbana ve kisambu na dibuta,
Yesu ke zola kukutana na beno kuna; (Beno
kele na dilaka, awa.)
Yandi ke katula mawa ya beno nionso,
Oh, beno zimbana ve kisambu ya beno na
dibuta.

179 [Mpangi mosi ya kento me tuba, “Mpangi Branham, mu lenda tuba kima?”—Mu.] Kieleka nge lenda, Mpangi ya kento. [Mpangi ya kento me banda na kuzonza. Kisika ya mpamba na bande.] Mpangi-kento Nash, ya kele kieleka mbote. Oh, kana kaka nge ke:

Kana beto sala kivuvu mpe kusala ata mbala
mosi ve ntembe, kieleka Yandi ke basisa beto;
Beno nata kaka kizitu ya beno na Mfumu mpe
kubika yawu kuna.

Beno bika yawu kuna, beno bika yawu kuna,
Beno nata kizitu ya beno na Mfumu mpe beno
bika yawu kuna;

Kana beto sala kivuvu mpe kusala ata mbala
mosi ve ntembe, kieleka Yandi ke basisa
beno;

Beno nata kizitu ya beno na Mfumu mpe beno
bika yawu kuna.

180 Beno zola ve bankunga yango ya ntama? Oh, mu kaka . . . Mu ke kwikila ti bantu yina bakaka bike mpe vwandaka ya kutwadisa na Mpeve-Santu na kuzwa yawu.

181 Mutindu Fanny Crosby yina vwandaka mpofo ntangu bantu yina ya yinza na kilumbu yina vwanda meka na kusala yandi

kusonika bankunga ya yinza, na kutubaka, “Mbote, nge ke vwanda kento ya bimvwama.”

Yandi tubaka, “Mu pesaka luzingu ya munu na Klisto, mpe talanta ya munu nyonso.” Yandi vwandaka mpofo, beno zaba. Yandi tubaka, “Mu—mu ke defa luzingu ya munu mpe nyonso na Klisto.” Yandi vwandaka . . .

¹⁸² Mpe kuna bawu mutindu dasukilaka yandi samu yandi pesaka manima na bweso ya mutindu yina. Yandi tekaka ve bukuluntu ya yandi mutindu Tata Presley mpe bayankaka salaka, kasi yandi—yandi landilaka na kuvwanda ya kusungama. Na yawu yandi—yandi. . . Ba—ba bikaka yandi, na kutubaka, “Na yina ntangu beno ke kuma na Mazulu, kana ya kele na kisika ya mutindu,” ba tubaka, “kana nge kele mutindu nge kele awa, nge ke vwanda mpofo.” Ba tubaka, “Wapi mutindu kana nge *kele* mpofo,” ba tubaka, “wapi mutindu nge ke zaba Yandi?”

Yandi tubaka, “Mu ke zaba Yandi. Mu ke zaba Yandi.”

Ba tubaka, “Wapi mutindu kana nge kele mpofo? Wapi mutindu kana nge *kele* mpofo?”

Yandi tubaka, “Mu ke kuwa na bitambi ya bazanga.” Kuna yandi balukaka, yandi bandaka na kutambula, mpe yandi tubaka:

Munu ke zaba Yandi, Mu ke zaba Yandi,
Mpe munu me sumbuluka na lweka na Yandi
mu ke telema;
Mu ke zaba Yandi, mu ke zaba Yandi
Na bitambi ya mazanga na diboko ya Yandi.

¹⁸³ O Yesu ya munu, na bamputa yango tanu ya ntalu, yina basikaka samu na munu kuna, wapi mutindu mu lendaka ntete kumanga Muntu yango ya ntalu? Ti mu kufwa, ti mu kwenda na . . . Ti mu baka nzila ya nyonso, kasi ata mbala mosi ve ti mu manga Muntu yango ya ntalu yina basisaka menga kuna yina kufwaka samu na munu. Yinga.

¹⁸⁴ Mpe na yina beno ke kwenda na nkokila yayi, beno zola: *Kubaka Nkumbu Ya Yesu Na Beno*. Mbote mingi, mpangi ya kento. Beto ke telama ntangu yayi, beto nyonso kintwadi.

. . . Nkumbu ya Yesu na nge,
Nge mwana ya mawa mpe ya kiadi;
Yawu ke pesaka kyese mpe kikesa,
Baka Yawu bisika nyonso nge ke kwenda.

Nkumbu ya Ntalu, (Nkumbu ya Ntalu!), O
Nkumbu ya kitoko! (O Nkumbu ya kitoko!)
Kivuvu ya ntoto mpe kyese ya Mazulu;
Nkumbu ya Ntalu, (Nkumbu ya Ntalu!), O
Nkumbu ya kitoko!
Kivuvu ya ntoto mpe kyese ya Mazulu.

Ntangu yayi na yina beto ke kulumusa bayintu ya beto, mpe kuyimba na malembe:

Beto ke fukimina Nkumbu ya Yesu,
Beto ke fukama na makulu ya Yandi,
Samu na kubyadisa Yandi ntinu ya bantinu na
Mazulu,
Ntangu nzietolo ya beto ke suka.
Nkumbu ya Ntalu, O Nkumbu ya kitoko!
Kivuvu ya ntoto mpe kyese ya Mazulu;
Nkumbu ya Ntalu, O Nkumbu ya kitoko!
(Nkumbu ya kitoko!)
Kivuvu ya ntoto mpe kyese ya Mazulu.



NSUNGI YA DIBUUNDU YA SMYRNE KNG60-1206
(The Smyrnaean Church Age)

BANDANDANI YA LUZAYIKISU YA YESU KLISTO

Nsangu yayi ya Mpangi William Marrion Branham, kulongamaka na Kingelesi, na Kilumbu ya zole na nokila, na kilumbu ya 6 ya Ngonda ya kumi na zole, na mvula 1960, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org